




mm

322

N

Milik Departemen P dan K
Tidak diperdagangkan
Untuk umum

Hikayat Raja Bada

Ramli Harun



Departemen Pendidikan dan Kebudayaan

BIBLIOTHEEK KITLV



0098 0845

**HIKAYAT
RAJA BADA**

Wahid Husein

Departemen Pendidikan dan Kebudayaan
PROYEK PENGERTIAN BUKU KLASIK
INDONESIA DAN LAMPARAN
Jakarta 1992

Hikayat RAJA BADA

Alih aksara

Ramli Harun



Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1982

Proyek Penerbitan Buku Sastra
Indonesia dan Daerah

Hak pengarang dilindungi undang-undang



Departemen Pendidikan dan Kebudayaan
PROYEK PENERBITAN BUKU SAstra
INDONESIA DAN DAERAH
Jakarta 1982

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalan sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahannya pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta 1982

Proyek Penerbitan Buku Sastra
Indonesia dan Daerah

PENGANTAR

Hikayat yang menceritakan raja Khandak melawan Nabi Muhammad dan Ali bin Abi Thalib, semata-mata hasil imajinasi pengarang dan tidak berdasarkan fakta sejarah. Sepanjang pengetahuan kami dalam sejarah bangsa Arab tidak terdapat raja yang bernama Khandak, kecuali perang antara pasukan Islam yang menahan serangan kaum Quraisy di Medinah yang terkenal dengan nama "Perang Khandak". Demikian pula tidak ada raja yang bernama Bada (Badar), kecuali "Perang Badar" yang terkenal dalam sejarah Islam. Namun sebagai sebuah karya sastra yang disusun dengan bahasa yang baik, hikayat ini dapat dijadikan sebagai milik kebudayaan daerah yang berharga.

Pada akhir cerita dengan cara merendahkan diri penulis mengatakan bahwa ia malu menyebutkan namanya. Demikian pula ia tidak menyebutkan tahun penulisannya, selain hari dan jamnya. Hal semacam ini sering kita jumpai dalam hikayat Aceh. Ia hanya menyebutkan nama kampungnya yaitu Leubok Tuwi, berdekatan dengan kampung Jungka Gajah. Dikatakannya pula bahwa dalam menulis hikayat ini, ia telah merobahnya sedikit dari naskah aslinya. Demikianlah halnya dengan kebanyakan hikayat Aceh.

Naskah tulisan tangan huruf Arab ini, kami peroleh dari Pusat Dokumentasi dan Informasi Aceh bulan September tahun 1981. Ukurannya 20 x 14 cm, tebal 79 halaman dan tiap halaman terdiri dari rata-rata dua puluh satu baris.

Seperti halnya dengan beberapa hikayat lain yang sudah kami sunting atau alih aksarakan ke dalam huruf Latin, hikayat ini pun telah kami pengga-penggal menjadi enam anak judul.

Penyunting

ASOE HIKAYAT

' MUKADDIMAH	15
I. RAJA KHANDAK KEUMEUNG LAWAN NABI	19
II. SAIDINA ALI TAMUEK LAM PRANG	35
III. RAJA BADA PEUINGAT AYAH	49
IV. ABEH BINATANG JIKRAH JAK NGAZA	65
V. RAKYAT SEUREUPHA RAJAPI MATE	83
VI. TREN UJEUEN BATEE PADEE UBENA	105

RINGKASAN CERITA

Hikayat Raja Bada

Pada suatu hari Raja Khandak bermufakat dengan para panglimanya untuk menyerang Nabi Muhammad dan Saidina Ali. Malaikat Jibril datang dan memberitahukan rencana Raja Khandak itu kepada Nabi Muhammad. Saidina Ali meminta izin kepada Nabi Muhammad untuk menyerang lebih dahulu sebelum Raja Khandak mendahuluinya.

Mengetahui Ali dengan pasukannya telah datang, Raja Khandak menyusun barisan dan mempersiapkan pasukannya. Rencana mereka untuk menyerang Mekkah dan Medinah gagal karena Ali dan pasukannya telah mendahuluinya.

Tujuh orang pahlawan perang dari negeri Habsyi diperintahkan oleh Raja Khandak untuk menyerang pasukan Ali. Nabi Muhammad sendiri bersama para sahabatnya mengatur siasat perang dalam kemah. Pertempuran seru terjadi. Ali dengan pedang Zulfakarnya mengamuk dan tak terhitung korban yang jatuh di pihak lawan. Mereka mundur dan melaporkan kepada Raja Khandak.

Raja Bada, yaitu putra Raja Khandak yang gagah berani memanggil tiga orang pahlawannya yang terkenal untuk melawan Ali. Dalam suatu adu senjata, seorang di antara mereka bernama Uzmah tewas di tangan Ali.

Raja Khandak memerintahkan sepasukan balatantra di bawah pimpinan Masyil dan Qabit untuk menyerang Mekkah dan Medinah. Dalam pikirannya apabila Mekkah dan Medinah dapat ditaklukkan, Ali dan Nabi Muhammad dengan mudah dapat ditundukkan. Tetapi berkat keramat Mekkah dan Medinah sebelum mereka sampai di kedua kota suci itu semua pasukan Masyil dan Qabit mendapat bencana. Mata dan telinga mereka menjadi buta dan tuli. Ketika mereka mundur mata dan telinga mereka kembali seperti semula. Mereka menghadap Nabi Muhammad dan menyatakan masuk agama Islam. Hanya tujuh orang yang kembali kepada Raja Khandak.

Oleh karena banyak pasukannya yang telah memihak kepada

Nabi Muhammad atau terbunuh, **Raja Khandak** bersama **anaknya Raja Bada** mengerahkan lagi rakyatnya untuk menyerang **Ali dan Nabi Muhammad**. Perang berkecamuk lagi. **Masyil dan Qabit** berhadapan dengan tujuh orang pahlawan **Raja Khandak**. Mereka tidak berhasil mengalahkan **Masyil dan Qabit**. Dalam suatu kesempatan adu senjata, pedang **Zulfakar Ali** dapat menewaskan ketujuh pahlawan itu. **Raja Khandak** sangat murka melihat pasukannya tidak pernah menang dalam melawan **Ali**.

Raja Bada belum putus asa. Ia mengerahkan rakyatnya termasuk berbagai jenis binatang untuk memperkuat pasukannya. Ia sendiri yang memimpin balatentaranya yang besar itu. Saat penyerangan pun sudah ditentukan sesuai dengan petunjuk seorang ahli nujum.

Dengan mengendarai seekor harimau dan dibantu oleh sejumlah hewan lainnya **Raja Bada** bertemu dengan **Ali** yang sedang mengendarai kudanya. **Nabi Muhammad** dengan beberapa orang pengawalinya juga terjun ke medan perang. **Ali** dapat menghancurkan semua pihak penyerang dan **Nabi Muhammad** sendiri membuat musuh tidak berdaya ketika "ahlul sama" membinasakan balatentara **Raja Khandak**. Sisa-sisa pasukannya memeluk agama Islam dan hewan-hewan datang bersembah sujud mohon ampun dari **Nabi Muhammad**.

Raja Bada dan ayahnya sangat murka. Dengan mendatangkan bala bantuan yang lain mereka menyerbu lagi. Seorang menteri bernama **Humak** ditewaskan oleh **Masyil**. **Raja Khandak** bersama pasukannya sempat mengepung **Nabi Muhammad**. Tetapi berkat bantuan Tuhan **Raja Khandak** mendapat mala petaka. Pasukannya berperang sesama sendiri. Ia sendiri banyak membunuh anak buahnya. **Raja Bada** dengan harimaunya berhadapan dengan **Ali**. **Ali** mencoba membujuk raja muda ini supaya insaf. Tetapi ia tetap hendak menyerang **Ali**. Pertarungan sengit satu lawan satu terjadi. Akhirnya **Raja Bada** menemui ajalnya.

Raja Khandak yang tidak tahan lagi menghadapi mukjizat **Nabi Muhammad** mengundurkan diri dan lari ke istananya. Karena lelah ia tertidur nyenyak dan tidak mengetahui bahwa anaknya sudah mati. Pasukan **Ali** mengikutinya dari belakang. Ketika

terbangun dari tidurnya ia melihat pasukan Nabi Muhammad sudah mengepung pertahanannya. Ali sendiri menemui Raja Khandak dan berusaha menasihatinya supaya menyerah. Karena ia tetap melawan maka dalam suatu pertarungan singkat Ali dapat menewaskannya.

Sesudah Raja Khandak mati semua rakyatnya memeluk agama Islam, Masyil dan Qabit masing-masing diangkat oleh Nabi Muhammad sebagai raja dan perdana menteri negeri Khandak.

HIKAYAT RAJA BADA

Bismillahirrahmanirrahim

MUKADDIMAH

Bismillahi phon mulaan
Nama Tuhan zat nyang suci
Beu Tuhan bri beu kong iman
Beureukat junjongan Muhammad Nabi

Lagi baka lom ngon kadim
Nyang halim sayang barangri
Lom ngon rahman neubri kayem
Nyang rahim dudoe neubagi

Peue talakee Tuhan peutroh
Meuseuki cicem na redeuki
Dan rupa neuboh meulaen
Maseng-maseng nan neurasi

Lom sigo treuk dali mungken
Dilee gasien dudoe gani
Lom ngon rupa lagi canden
Dudoe laen dum teurjali

Meunan kheundak Poku Tuhan
Teutap haba nyan 'oh noe lanti
Bak siuroe teukeudi Tuhan
Ulon tuan jak peureugi

Hana meuho taloe jalan
Meuteumeung sinan sidroe akhi
Nama geuhei Teungku Hasan
Meurumpok sinan bak warong kupi

Geubri keu lon ie sicawan
Teuma 'oh lheueh nyang peugah cakri
Meuteuoh le bhah sulotan
Peurjalanan nyang ka lawi

Teuma meuteuoh bhah Raja Bada
Got han tara hikayat ini
Teuma geujok ngon keureutah
Geuyue seuleuah ubak kami

Teuma ulon tuleh pantah
Alhamdulillah le lon puji
Kareuna di lonpi harok leupah
Seubab cidah lon deungo bunyi

Kareuna harok jeuet lon surat
Kareuna ladat lon jep kupi
Meuna umu lon seulamah
Bah lon surat baranggakri

Insyah Allah wahe sahbat
Tuhan halarat peutroh janji
Uloteu nyoe han teudapat
Makna kitab han lon tukri.

Eleumee kureueng akai singkat
Bak adat meunan he nyak ti
Bube mufom dalam Taurat
Meuhan dapat balek lagi

Insyah Allah tulong halarat
Ulon surat haba ini
Bitpi hadih Rasulallah
Tapeugah han jeuet teutapi

Pueh lon pike hana ek jlah
Seubab harah le teubuni
Hana keunong ban nyang surah
Lafai salah hana meuri

Nyankeu seubab jeuet keu gundah
Hana keumah le meutakwi
Lafai ladom basa Arab
Meusapat ngon basa Jawi

Basa Aceh na mupat-pat
Nyang le that basa Arabi
Keupeue guna le hikayat
Meutan mangat soe peudoli

Beu Tuhan bri jeuet lon ubah
Bu meutuah jaroe gaki
'Oh noe abeh nyan khuteubah
Jinoe lon kisah hadih Nabi

Soe nyang ikot Rasulullah
Tuhan balah pangkat tinggi
Haba lon nyoe kon beurakah
Dalam naseukah Kitab Mahalli

Sinan meuteumeung masalah
Dalam naseukah kitab beugini
Laen nibak nyan han peue peugah
Fireuman Allah hana khali

Nibak laen dum peurintah
Nyang meugah tajak u haji
Seubab mukjizat Rasulullah
Le faidah Tuhan neubri

Soe nyang pateh le manfa'at
Soe nyang pubuet fahla neubri
Tuhan neubri ase rahmat
Donya akhirat bandua si

Nibak donya manyang pangkat
Tuhan halarat bri redeuki
Soe nyang ikot Rasulullah
Syeuruga balah Tuhan neubri

Meutapateh meuteumee nikmat
Soe nyang sisat jeuet keu 'asi
Haba lon nyoe dalam kitab
Fireuman halarat Tuhanku Rabbi

Soe nyang patche ban amanat
Uroe akhirat lheuëh bak titi
Meunan meuteumee lam riwayat
Muwafakat ngon hadih Nabi

Suroh Tuhan bak syari'at
Nabi Muhammad bek tabeunci
Teumpat keurajeuen di nanggroë Arab
Sajan sahbat dum ansari

Seugala binatang dum lat-batat
Nabi Muhammad dum jipuji
Teuma jinöe wahe sahbat
Kafe laknat nyang meuungki

Abëh neuprang kafe laknat
Buet sahbat Saidina Ali
Ho nyang neuprang abëh ranap
Ho neupeunap abëh sunyi

Bak siuroe prang raya that
Sidroe mawot apa Nabi
Tuanteu Hamzah yoh nyan mawot
Lam prang Uhud jeuem teukeudi

'Oh lheuëh mate Saidina Hamzah
Maken juah kafe 'asi
Teungoh-teungoh mita ilah
Rasulullah jimeung taki

Teuduek haba Rasulallah
Jinöe lon kisah laen lagi
Ajaëb subhanallah
Nyöe lon kisah kafe hareubi

I. RAJA KHANDAK KEUMEUNG LAWAN NABI

Raja Khandak deungo lon kisah
Keurajeuen luah hana sakri
Rakyatji le that barollah
Aneukji saboh beu taturi

Raja Bada nan geupeugah
Rupa indah hana sakri
Bak puprangan beuhe leupah
Deungon pantah hana sakri

Mat peurise reugam peudeueng
Kafe bajeueng that beurani
Bak puprangan han tom jiplueng
Ban rimueng bueh hana sakri

Rakyatji le tamse naleueng
Tamse beudeueng dalam tuwi
Troh nanggroe jen jikeurajeuen
Abeh reuen-mareuen baranggari

Abeh jitupeue basa binatang
Kon bubarang that juhari
Binatang gle nyang teureubang
Dalam tangan raja 'asi

Meugahji that hana padan
Ngon pahlawan dum Habeusyi
Hebat hebat dum analan
Badan hitam bieh Habeusyi

Nyankeu ureueng nyang jak sajan
Me pakaian kafe hareubi
Tadeungo adoe lon peugah nan
Bak bilangan dum barangri

Peurtama Jirah keudua Rakah
Keulhee Adimah geurasi nama
Keupeuet Mukabah limong Safakah
Keunam Kadimah teuma lagi

Teuma sidroe treuk nan Radakah
Tujoh sudah wahe akhi
Teuduek siat nyang pahlawan
Muwoe karangan kafe 'asi

Raja Khandak jimupadan
Bri utosan jeuep-jeuep neugri
Raja Khandak nyan sulotan
Seutot pahlawan dum barangri

Abeh teuka dum u dalam
Bak sulotan kafe hareubi
Ampon tuanku syahi alam
Peue habaran nyang meuseuke

Raja Khandak seuot nyoeban
Na peue padan he boh ate
Nyang kuseutot dum mupakat
Musyawarat bek teukeuse

Hana sapeue laen hajat
Buet Muhammad ulon syawe
Adat tatem wahe sahbat
Bek le lambat tamupake

Ulonteu nyoe kupeuingat
Meularat bandumteu sare
Gata udep beu na syarat
Nyang mawot akan teutapi

Meuna mantong nyan Muhammad
Ngon sahbat Saidina Ali
Baranggadum tamupakat
Nyang meukeusud han ek ase

Di jih sidroe badan bulat
Geutanyoe le that dum seukali
Meusigeutu han ek hajat
Sigohlom punah eleumee sihe

Han jeuet meunan lon puteupat
Abeh kiamat geutanyoe mate
Nyang got jinoo ngon mupakat
Tamusyawarat dumteu sare

Raja Khandak meunan kalam
Bak uroe nyan dumji sare
Jiseuot le jikheun nyoeban
Dum pahlawan raja kafe

Ampon tuanku bek tagundah
Buet ube drah peue tapike
'oh meuteumee han kukeubah
Beuthat meugah baranggabe

Hebat hebat dum analan
Meunan jikheun jimeucakri
Saidina Ali ulonteu plah
Rasulullah kupoh mate

Bek meuureueng nyan ube drah
Beuthat gajah ek kurante
Baranggakri kuseuleuah
That meugah jih ube campili

Meunyo hana ban kupeugah
Dalam babah gata ruge
Beukit meunan dum pahlawan
Jak beurjalan bek lale le

Meunyo sabet keurugian
Meuhad meunan roh di akhe
Kacok alat pileh rakan
Me angkatan tumbak beude

'oh lheueh ase sileungkapan
Jibeurjalan laju sare
Raja Khandak nyang sulotan
Ngon pahlawan jimeujanji

Teuduek siat nyang haba nyan
Muwoe karangan ubak Nabi
Tuan teu Ali sahbat junjongan
Nyang pahlawan that barangri,

Lagi rancak ngon bijakan
Hana padan that juhari
Hana sidroe laen nibak nyan
Meulaenkan Saidina Ali

Ate beuhe muka juah
Ngon pantah hareuga piti
Hana sapat nyang na salah
Bandua blah jaroe gaki

Nyankeu sahbat Rasulullah
Nyang meugah nibak prang sabi
Ban neudeungo haba meunan
Beungeh han ban Saidina Ali

Tuanteu Ali musyawarat
Ngon Muhammad duek beureunti
Laen bak nyan dumna sahbat
Meusapat kawom ansari

Ya Nabiyullah kafe laknat
Ri ka troh had jan jiili
Pakri jalan jinoe sahbat
Ya Muhammad tapeugah kri

Meukon jinoe muwafakat
Meuka lambat jeuet keu rugi
Teuma seuot Nabi Muhammad
Ban nyang kheundak Tuhanku Rabbi

Ulonteu nyoe han teudapat
Ngon kuatpi tan seukali
Tuanteu Ali tanyong leugat
Nabi Muhammad bri mufeuti

Teungoh-teungoh geumupadan
Tren fireuman bak Jebrai
Malaikat suroh Tuhan
Bri habaran ubak Nabi

Meuteumee le meuhadapan
Saleuem haluan bandua si
'oh lheueh saleuem mumat jaroe
Nabi geutanyoe deungan Jebrai

Nyang troh langkah ulon keunoe
Tuhan kamoe yue bak Nabi
Neuyue peugah kafe pindoe
Bak uroe nyoe jiprang Nabi

Beukit jitamong nanggroe Makah
Ka'bah Allah ek jiungki
Meunan fireuman nibak Po tallah
Neuyue peugah ubak Nabi

Takrah rakyat dum taseutot
Keudeh u rot preh talanti
Bek tabri troh keunoe jijak
Meunan nyang got he ya sai di

La takhaf wa la tahzan
Fireuman Tuhan bek tagli-gli
Bek tatakot he junjongan
Kafe jahnam nyang meuungki

Meunan suroh nibak Tuhan
Neuyue iman ubak Nabi
Abekhaba ngon Muhammad
Malaikat neukeumbali

Nabi peugah dum bak sahbat
Fireuman halarat Tuhanku Rabbi
Lam meuseujid duek meusapat
Sajan sahbat dum ansari

Ban geudeungo ate mangat
Muwafakat ban kheun Nabi
Nibak laen bandum sahbat
Nyang kuat Saidina Ali

Ate beuhe lagi jeungkat
Hana dapat that beurani
Ban neudeungo meunan pakat
Neulumpat le hana sakri

Neulakee idin bak Muhammad
Sajan sahbat dum ansari
Hana sidroe nyang han pakat
Teuduek seungap teukap bibi

Neumaritle leugat-leugat
Hana siat nyang na sunyi
Meuka idin bak halarat
Han kutakot kafe 'asi

Kulakee tulong nibak Allah
Ngon afuwah do'a Nabi
Beu jeuoh nyang jalan sosah
Nyang mudah Tuhan karonya

Kafe paleh han kukeubah
Jinoe kupoh bansineuna
Neubet jaroe bandua blah
Deungon seumbah sajan neuba

Di nap Nabi Rasulullah
Wallah billah le neukata
Meunyo dudoe teuma ubah
Beu sret nikah lon meelana

Siti Fatmah aneuk Nabi
Han kuwoe le barangjan masa
Meugoh talo raja kafe
Bak esteuri han kugisa

Raja Khandak kupoh mate
Nyang meuungki keu Rabbana
Meunan neukheun tuanteu Ali
Ubak Nabi Rasul kita

Neucom jaroe deungon kaki
Neubeudoh le ek cong guda
Troh ateueh rueng neuhei sare
Neudeumpek le ngon meutaga

Guda saboh droeneu sidroe
Di jaroe peudeueng zulfaka
Sibuleuen jak jeuoh nanggroe
Kafe pindoe neujak mita

'oh troh keudeh rab ka sampoe
Deumpek tuloe ngon meutaga
Raja Khandak tanyong meunoe
Peue meubunyoe dalam rimba

Han tom kudeungo meunan macam
Siulahan su geureuda
Saleh cit su lumo hitam
Nyang gulam bumoe donya

Siulahan sang kiamat
Kudeungo that raya taga
Teuma seuot teungku meuntroe
Kon kiamat po meukuta

Tuanteu Ali nyang that kuat
Laen rakyat teungoh teuka
Beukit meunan jak tadapat
Cuba lihat dumna tantra

Jibeudoh le jijak leugat
Deungon alat sajan jiba
Leubeh kureueng dalam hisab
Lam riwayat dua laksa

Tuanteu Ali han jitupat
Kafe laknat jak mumita
Teuduek 'oh nan dulee siat
Muwoe riwayat Nabi kita

Rasulullah neubeurangkat
Suroh halarat Tuhan Esa
Laen bak nyan teuma rakyat
Silaksa peuet ribee rakyat neuba

Kheundak Tuhan kudrat iradat
Rab ka troh had jeuet prang kuta
Geujak kalon tuanteu Ali
Sahbat sare dum seureuta

Ngon peurasanpi damoh that
Ireng rakyat balatantra
Jipalee gong ngon bunyoe that
Galak rakyat meuseusuka

Angka-angka ngon pupanji
Payong ceuradi meugeugisa
Laen bak nyan han soe tukri
Ngon napiri dan nukara

Padum lawet neupeureugi
Sampoe Nabi nanggroe raja
Ban neukalon ka troh Nabi
Tuanteu Ali tren cong guda

Neujak meuteumeung deungon Nabi
Neupeureugi sigra-sigra
'oh meuteumeung deungon Nabi
Neupeurab le peumulia

Teuma Ali neubet jaroe
Neupeugah proe bak Saidina
Ya Rasulullah idin kamoe
Bak siseun nyoe bah lon ngaza

Nabi peugah ubak sahbat
Pioh siat dumteu rata
Pakon meugriet that teudap-dap
Bahle beu rab keunoe teuka

Boh pupanji deungon kimah
Bah tapioh siklep mata
Haba Nabi ulon pioh
Jinoe lon boh Raja Bada

Ban jideungo Nabi ka troh
Pahlawan tujuh jajak mita
Jajak laju leugat-leugat
Troh bak teumpat Nabi kita

Jieu pupanji Nabi Muhammad
Teusurat kalimah dua
Teuma jitanyong ubak Nabi
Peue pupanji soepo atra

Ngon angkatan dum ka ase
Rame-rame kueue teuka
Nyang got tawoe jak keumbali
Meuhan mate kupoh fana

Teuma seuot Saidina Ali
Ngon Nabi bek kameuseunda
Nyang got beudoh bek le cakri
Kutadi han jeuet kagisa

Ban jideungo tuto seungkoe
Beudoh jiwoe ubak raja
'oh troh keudeh jibet jaroe
Ampon kamoe po meukuta

Seumbah tuanku di bawah kaki
Saidina Ali sabet teuka
Rakyat le that hana sakri
Nyang beurani lapan laksa

Bek le neujak u Madinah
U Makah bek le tangaza
Pahlawan tujuh meunan peugah
Jipeuseumbah ubak raja

Raja Khandak tanyong leugat
Adat tahisab padum laksa
Ampon tuanku han troh dapat
Teutapi rakyat le lagoena

Beukit meunan got takarat
Yoh gohlom rab keunoe teuka
Raja Khandak meunan kasad
Tuhan halarat han neurela

Jibeudoh le teuma leugat
Lheueh mupakat deungan raja
Jipeh tambo deungan geundrang
Rakyat meukumang meugeugisa

Na tujuh ploh uleebalang
Nyang jak sajan Raja Bada
Nyankeu ureueng nyang pahlawan
Rakyat sajan troh meulaksa

Jibeudoh le teuma tajam
Ban boh sungkam pantah sigra
Meuteumeung le meuhadapan
Deungan tuan Ali Murtala

Ateueh guda neumeukandran
Di tangan peudeueng zulfaka
Ban neukalon kafe laknat
Neulumpat le dalam tantra

Di kafepi jiek leugat
Jikarat ban siseun lingka
Jitap jitop hana padan
Kafe jahnam that guranta

Deungon tulong Polu Tuhan
Jisingahan bak angeeta
Zulfaka peudeueng analan
Di tangan neupuba-puba

Ban neukalon hana ruweueng
Neuklik yoh nyan deungon raya
Langet bumoe tamse karam
Buket kareueng sang meuleua

Ban jideungo kafe bajeueng
Rasa tuleueng sret u lua
Bitpi meunan hana jiplueng
Jihudom ban siseun lingka

Ban neukalon le that jiek
Neutarek cokma nyang raya
Ka neupoh le ateueh ulee
Su meukeutee meuk teupanca

Ladom muka ka beukah lhee
Ladom ulee ka jeuet dua
Ladom badan ladom singkee
Na lhee ribee rakyat fana

Ban jikalon han got lagee
Kafe asee dum jiguda
Saidina Ali tinggai sidroe
Dudoe neuwoe bak Saidina

Teuma neucom gaki ngon jaroe
Teuma dudoe meusuara
Tuhan tulong dum geutanyoe
Ka seuleusoe saboh bahya

Teuduek siat nyang haba nyoe
Kisah muwoe ubak raja
Amma bakdu teuma dudoe
Kafe pindoe lon calitra

Pahlawan tujoh ka troh jiwoe
Jipeutoe bak raja raya
'oh meuteumee jibet jaroe
Ampon kamoe po meukuta

Le that rakyat tuanku mate
Saidina Ali nyang pufana
Pahlawan that hana sakri
Ngon beurani hana tara

Cokma ngon peudeueng jipeunari
Bagoe suwe dalam tantra
Barangasoe gadoh pike
Meunyo ngon Ali po meukuta

Bak jimeucang hana sabe
Beuhe ate silagoena
Ban jideungo meuhei sare
Jilumpat le dalam tantra

Meunankeu phon jeuet teukeudi
Jeuet keu mate kamoe dumna
Ban jideungo le that mate
Raja kafe beungeh raya

Jikap bibi hana lheueh le
Putu mise hana reuda
Raja Khandak duek di bale
Sabda jibri jeuep peutua

Jeuep-jeuep nanggroe jibri surat
Ube neumat Raja Bada
Uroe malam rakyat ili
Sipai deungon lasyeuka

Ladom taeu me meuriam
Ladom gulam beude lila
Rakyat teuka uroe malam
Jitren curam ubak raja

Abeh teuka jeuep-jeuep nanggroe
Kafe pindoe le that tantra
Nyankeu dum buet ka lon peugah
Ban nyang leumah bak calitra

Meunan kata saheb kisah
Teutapi Allah that sibeuna
Teuduek 'oh noe dilee siblah
Nyoe lon kisah nyang keudua

Buet hikayat meuriwang ato
Amma bakdu lon peuriwang
Sinoepi ka geumupike
Sahbat Nabi seukalian

Dalam kimah dong beureunti
Deungon Nabi sinan sajan
Nyang pahlawan Saidina Ali
Laen lagi dumna ikhwan

Muwafakat buet prang kafe
Hajat ate jak syahidan
Ureueng mukmin sabe pike
Bek teukeuse deungon Tuhan

'oh lheueh pakat dum ka ase
Geubeudoh le sahbat junjongan
Sira geujak geuhei sare
Troh bak kafe jideungoran

Supih raya hana sabe
Sang reuloh gle gunung manyang
Ban jideungo uleh kafe
Jibeudoh le ban boh sungkam

Na tujoh droe nyang beurani
Bajee rante dum di badan
Bak takalon sang-sang dali
Rot Nabi meunyum tiwasan

Meunan teuseubot dalam rawi
Tuhanku Rabbi nyang na tuban
Rotdeh rotnoe bandua si
Hana sakri that analan

Surak deumpek geuhei sare
Saidina Ali phon mulaan
Neutamong lam tantra kafe
Meuteumee le meuhadapan

Ban jikalon tuanteu Ali
Di kafepi le amilan
Kafe paleh le that cakri
Saidina Ali jimeung tawan

Tulong Tuhan Poku Rabbi
Neudeumpek le neutak yoh nyan
Na sireutoh sigo mate
Teutiek bangke dum meutimphan

Le that mate rakyat kafe
Darah ile sang ie kubang
Kafe paleh jiek sabe
Dumnan mate ka teureuban

Han peudoli nyan ka mate
Saidina Ali jimeung lawan
Leupah beungeh hana sakri
Meusoseue le dalam kawan

Kheundak Tuhan Rabbon Kade
Rakyat kafe le that simpan
Mate siribee hana lon gli
Laen lagi teuka keunan

Surak deumpek jihei sare
Abeh mate dum pahlawan
Pahlawan tujuh nyang beurani
Jikap bibi jiek meusyam

Ngon beuhepi hana sakri
Ban keudidi gidong ek pam
Ban meuteumee Saidina Ali
Ka jitadi laju meukram

Hana keunong Tuhan neubri
Ateueh bumi keudeh meukeutam
Jikalee kon roh neukilah
Abeh bicah tuboh badan

Kafe paleh ate saket
Jipoh bit-bit hana padan
'oh neukalon yoh nyan marah
Neugrop pantah dalam kawan

Zukfaka peudeueng meutuah
Ujong mirah ban meulisan
Kafe mate that barollah
Han ek peugah kheundak Tuhan

Abeh jiplueng dum jiguda
Dalam rimba dum sibarang
Tuanteu Ali that guransang
Mantong sinan dalam padang

Teuduek siat nyang haba nyan
Muwoe karangan Nabi kita
Neudeungo puprangan that meutunang
Neujak kalon neupeunyata

Ban meuteumee deungon Ali
Neupeurab le neucom neuwa
Teuma neukheun Rasulullah
Bu meutuah he aneukda

Kulakee tulong ubak Allah
Beuek leupah nibak bahaya
Tuanteu Ali teuma peugah
Peudong kimah dum beurata

Meusidroë bek bicah kawan
Geutanyoe sang na keurija
Saidina Ali meunan titah
Rasulullah kabui sigra

Teutap Nabi dalam kimah
Muwoë kisah keu Raja Bada
Amma bakdu nyoe nyang indah
Saboh cidah nibak nyang ka

II. SAIDINA ALI TAMUEK LAM PRANG

Raja Bada yoh nyan marah
Jideungo gah Nabi teuka
Buet puprangan dum jipeugah
Ngon ayah sajan seureuta

Uroe malam ate sosah
Jieh salah han meurasa
Jiyue jak tueng teuma pantah
Pahlawan meugah lhee nyang raya

'Oh troh keunan jiisarah
Jipeugah haba rahsia
Raja Bada raya ilah
Buet ngon mudah jibicara

Muka mameh narit indah
Teubiet lam babah narit keulua
Pakri laku aduen meutuah
Lon ka teuhah tan le ija

Adat tatem taseuleuah
Meuhan bahle bah lon keurija
Pahlawan deungo meunan titah
Isyarah jitupeue makna

Ampon tuanku bak neugundah
Ali nyang meugah lon pufana
'Oh meuteumee han kukeubah
Kuramah beu jeuet keu sira

Meunyo hana ban lon peugah
Lon taubah balek nama
Meunan narit pahlawan Adimah
Ngon Asrakah nyang keudua

Nyang sidroe treuk Marakiah
Abekh sudah ka bantiga
Jih nyan banlhee pahlawan meugah
Bak kafilah saboh tantra

Ngon beurani lagi gagah
Deungon juah hana ngon sa
Tuanteu Ali jilakee plah
Jimeusumpah bak beurahla

Beudoh sinan jiplueng pantah
Deungon bagah tulong tantra
'oh troh keudeh jihei sare
Tuanteu Ali jijak mita

Rakyat le that hana sakri
Teungoh ili hana reuda
Cukop alat nibak jaroe
Peudeueng camcoe raya raya

Peurintah Allah Rabbon Kade
Tuanteu Ali deungo suara
Nyanpi hana ngon peusabe
Bagoe mise ngon tapeusa

Ban neudeungo jihei sare
Neudeumpek le bagoe raya
Pasang guda laju rijang
Dalam padang le neuhala

'Oh troh Ali dalam padang
Jihee dum ban siseun lingka
Na lhee ribee sigo mate
Rakyat kafe abekh fana

Bitpi dumnann ka hana le
Saidina Ali neuthee hana
Kata saheb eumpunya rawi
Teuma Nabi lom meusabda

Neukheun ubak Saidina Ali
He boh ate jak tangaza
Bek tatakot kafe hareubi
Tuhanku Rabbi tulong gata

Deungon rakyat bandum sajan
Jak syahidan he syeedara
Saidina Ali seuot nyoeban
Junjongan bek dilee gata

Meunan umu Tuhan neubri
Kafe Yahudi lon pufana
Meugoh mate nyawong simpan
Dalam kawan jih kumita

Adat manyang kupeugandoe
Jitren keunoe kutheun cintra
Beukit jigrop dalam apui
Kulangue u dalam nyala

Adat jilop dalam bumoe
Ulonteu nyoe tran u lua
Deungon tulong Tuhan sidroe
Kafe pindoe kujak mita

Jak bak Nabi neucom jaroe
Teuma dudoe ek cong guda
Guda utoh that seureuloe
Jitupeue barangpeue makna

Neulhat di rueng cokma beusoe
Jiplueng tanggoe dalam tantra
Ban meuhadap kafe pindoe
Neugrop bagoe gajah meunta

Tuanteu Ali pantah han soe
Guda ragoe that mubasa
Neugrop keudeh neugrop keunoe
Di jaroe peudeueng zulfaka

Ban neukalon jroh meupadoe
Meuhudom ban siseun lingka
Neupoh rotdeh jiek rotnoe
Meuree-ree teungoh jiteuka

Bajee direh keutupong beusoe
Dum jipakoe di keupala
Surak deumpek hana padoe
Kiam bunyoe sare gubra

Pahlawan meugah na banlhee droe
Hana bagoe that guranta
Jikap bibi ganceng gigoe
Jih banlhee droe dalam tantra

Cokma peudeueng mat di jaroe
Jimeuhei toe Ali Murtala
Wahe Ali tateubiet keunoe
Nyoepat kamoe sabe padra

Bak soe laen gata meugah
Ngon kee kuplah beu jeuet dua
Nyoe Adimah na katusoe
Teubiet keunoe kueur rupa

Ngon soe laen that keukrasan
Ngon kee rakan hilang nyawa
Tuanteu Ali yoh nyan marah
Muka juah jiek bisa

Neutanyong le pantah-pantah
Cuba peugah soebu nama
Beukit mate gata pahlawan
Na tinggai nan dalam donya

Jiseuot le pantah-pantah
Lon Adimah nyang peurkasa
Jeh sidroe treuk nan Sarsarah
Pahlawan meugah kamoe dua

Han jan abeh lheuëh jipeugah
Neutadi bagah deungon cokma
Di kafepi hana uga
Jibalah ateueh Saidina

'oh lheuëh jipoh khem meuhah-hah
Jipeugah ka hilang nyawa
Maken beungeh that amarah
Ka ingat kah he ceulaka

Teungoh teungoh khem meuhah-hah
Neubet pantah cokma raya
'oh ban neupoh ulee beukah
Kheundak Allah ka troh masa

Ka troh ajai nibak Tuhan
Kafe jahnam asoe nuraka
Ban jikalon ka le mate
Seugala be laen teuka

Teungoh jiek dum meurumpan
Jime sajan dum meulila
Surak deumpek hana padan
Neudapan u dalam tantra

Tuanteu Ali nyang pahlawan
Siulahan geumpa donya
Na siribee sigo mate
Ka gli ate bandum tantra

Raja Khandak yue peh geundrang
Rakyat meuriwang uroe seunja
Teuduek siat nyang haba nyan
Muwoe karangan Raja Bada

Amma bakdu nyoe nyang masen
Leubeh ceuken nibak nyang ka
Raja Khandak jimupakat
Musyawarat ngon aneukda

Raja Bada tuto jeungkat
Jikheun teupat ubak bapa
Beukit meunan ampon doli
Masyil ngon Kabed tayue dua

Tayue jak prang nanggroe Makah
Ngon Madinah tayue ngaza
Meukon meunan hana keumah
Prang nyoe tiwah bak ri rupa

Sidroeh saho tayue beurangkat
Neubri rakyat dua laksa
Meunan teungku nyang mupakat
Taprang teupat nanggroe dua

Meuka talo nanggroe Arab
Nabi Muhammad tapufana
Kafe paleh meunan pakat
Beudoh Kabeh teuma bungka

Umu sibuleuen jijak leugat
Troh u teupat nanggroe dua
Tulong Tuhan limpah kudrat
Ngon beureukat nanggroe dua

Ladom kheun kon nanggroe Makah
Ngon Madinah kon bandua
Soe nyang kheun kon ka meutuah
Soe nyang kheun sah ka buta mata

Tuloe geulunyueng bandua blah
Seubab jipeugah nanggroe dua
Teuma jiduek jimupakat
Pakri mangat nyang seujahtra

Nanggroe Makah sang keuramat
Meunan dapat kueur nyata
Bek antara taprang teupat
Meutalihat buta mata

Nibak meunan jeuet meularat
Tamupakat got tagisa
Ban jideungo meunan pakat
Masyil ngon Kated beungeh raya

Teuma jikheun ubak rakyat
Ngon nasihat jibri aja
Pakri tawoe han geumarah
Raja meugah yue keurija

Meuhan talo taprang Makah
Peue tapeugah ubak raja
Ban jideungo meunan titah
Jimeukeumah dumji rata

Nakeu baro jicok langkah
Bandua blah sigo buta
Teuma jplueng meuhah-meuhah
Allah Allah ka ceulaka

Bunoe kukheun han tapateh
Nyoe ka paleh buta mata
Nabi Muhammad Tuhan gaseh
Tapeujaeh uleh gata

Lheueh meudawa meunoe meudeh
Jibeudoh gleh dumji rata
Hana jan troh jiwoe keudeh
Bandum puleh buta mata

Muwoe ulang lhee peuet lapeh
Teuma meugureh dalam dada
Jimupakat bandum abeh
Jijak keudeh bak Saidina

Masyil ngon Kated mangat ate
Jak bak Nabi meu'ah deesya
Meunan jikheun dumji sare
Bek tawoe le ubak raja

Raja geutanyoe beukit mate
Nanggroe reule haro-hara
Aneuk peurumoh talakee pulang
Dan sibarang ngon areuta

Adat neugaseh deungon neusayang
Jikalee han bek takira
Raja geutanyoe han tom meunang
Saleh malang raja ceulaka

Meuna sibuleuen treuk tamuprang
Abek meuguncang buet Saidina
Tuanteu Ali that guransang
Peudeueng panyang hu ban sua

Gaseh Allah tulong Tuhan
Seubab junjongan Nabi mulia
Meunan bandum jimeukalam
Beudon yoh nyan jijak lanja

Meurumpok le ngon junjongan
Saleuem haluan mula-mula
Tuto mameh ban meulisan
Dong di hadapan Nabi kita

Jitiek alat kreh ngon peudeueng
Jimeuteumeung ngon meelana
Seureuta deungon jilakee meu'ah
Barang salah buet nyang ka ka

Nabi kalon meuhah-meuhah
Rasulullah neumeusabda
Hoka Masyil deungon Kabed
Meungucap syahdat dilee gata

Ban sare lheueh Nabi peugah
Meungucap pantah sigra-sigra
Ka jiekrai deungon lidah
Rasulullah neubri aja

Asyhadu an la ilaha illallah

Wahdahu la syarikalah

Wa asyhadu anna Muhammadan 'abduhu wa rasuluh

Kabed sunggoh bak agama

Lheueh Islam Masyil ngon Kabed

Teuma rakyat bansineuna

Teutap sinan jeuet keu sahbat

Nabi Muhammad lom meusabda

Nabi tanyong ubak Kabed

Peue na hajat tajak mita

Ya Rasulullah suroh sulotan

Geuyue jak prang nanggroe gata

Masa meujak peungeuh bandrang

'oh mupandang buta mata

Beudoh sinan dum meuriwang

Peungeuh bandrang miseue nyang ka

Nam tujuh seun meuulang-ulang

Teuma meuriwang keunoe bak gata

Ban neudeungo meunan jikheun

Sang teusinyom Nabi kita

Masa lon jak dilee siseun

Nyoehe bandum ka bak gata

Ya Rasulullah na tujuh droe

Keudeh jiwoe ubak raja

'oh nan teudoh dila haba nyoe

Ureueng tujuh droe lon calitra

Troh bak raja jibet jaroe

Ampon kamoe po meukuta

Masyil ngon Kabed hana le jiwoe

Tuanku droe ubak gata

Ka jitamong agama Islam

Keu syahi alam paleng muka

Ban raja deungo haba meunan

Jimeukalam ngon aneukda

Pakri laku aneuk badan

Pahlawan han le jigisa

Raja Bada seuot nyoeban

'Bahle meunan siklep mata

'Oh meuteumee tapoh mate

Peue tapike ureueng dua

Nyang got tuanku tameusyaw

Tayue pangge dum peutua

Tayue seutot dum beu abeh

Kawom wareh ban seulingka

Mangat meuri nyang han pateh

Nak tatuleh dum seugala

Teuma jinoo na sit ladom

Nyang tem kawom meuseutia

Meuka abeh dum gop hukom

Pat tacok lom toh syeedara

Di sinoo dum karong wali

Bandua si gata sama

Rot Muhammad meuka keunoe

Beu takiloe bek na reuda

Kareuna jih akai that jroh

Tuto leumoh na dum saka

Jipeutaklok seun-seun saboh

Abeh jiuroh nyang peutua

Kadang-kadangpi ek abeh

Han jipateh le kheun gata

Meutan wareh aneuk nanggro

Ngon siuroe ek seureupha

Beukit tajak nanggro laen

Han that gop syen tan syeedara

Adat tayue gop sang taupah
Keu peunayah dom takira
Kadang mate ureueng nyang meugah
Ngon nyan teulah gata papa

Meuka abeh syawe pike
Boh ate ban hukom gata
Raja Bada mangat ate
Jiyue pangge dum peutua

Abeh teuka seugala be
Ban nyang pike raja dua
Teuduek siat raja kafe
Sahbat Nabi lon hareutoe

Sidehpi ka geumeuase
Bandua si rotdeh rotnoe
Nyang peutua Saidina Ali
Sahbat sare dum sinaroe

Laen bagoe teuma lagi
Kabed ngon Masyil bandua droe
Masa dilee agama kafe
Yoh gohlom cre nibak nanggroe

Peurintah Allah Rabbon Kade
Agama Nabi teuma jiwoe
Rupa indah hana sakri
Ngon beurani hana bagoe

Umu baro mantong keucek
Sabe-sabe bandua droe
Ngon pahlawan hana sakri
Ngon beurani buta tuloe

'oh jitamong agama Nabi
Mangat ate bandua droe
Lheueh jiseumbah jaroe gaki
Idin neubri keu lon jinoo

Ya Rasulullah idin neubri
Lon poh mate bansinaroe
Hana patot jimeuungki
Keu Nabi ngon Tuhan sidroe

Teuma neukheun uleh Nabi
Jak boh ate bansinaroe
Tamong laju bek tapike
Teutapi bek sia-sia

Ban jideungo sabda Nabi
Jibeudoh le dum sinaroe
Di kanan peudeueng meuceuradi
Di kiri peurise beusoe

Jiek laju jikap bibi
Meuteumee le kafe pindoe
Ban meuhadap Kated ngon Masyil
Jitanyong le pajan kawoe

Rakyat teuka uroe malam
Jitren ubak Raja Bada
Leumbeng tumbak deungan camcoe
Kapak beusoe ube-be raya

Bajee direh dum jipakoe
Keutupong beusoe di keupala
Abeh teuka jeuep-jeuep nanggroe
Kafe pindoe le that tantra

Nyankeu dum buet ka lon peugah
Ban nyang leumah bak calitra
Meunan kata saheb kisah
Teutapi Allah thee sibeuna

Teuduek 'oh nan dilee siblah
Nyoe lon kisah nyang keudua
Saboh-saboh ulon ato
Bek meurungkho bak karangan

Meuka le peue roh meujampu
Meusoe nyang eu han jituban
Buet hikayat ban nyang tuto
Amma bakdu dudoe nibak nyan

Sinoepi ka geumupike
Sahbat sare seukalian
Dalam kimah duek beureunti
Deungon Nabi sinan sajan

Nyang peutua Saidina Ali
Laen lagi dum pahlawan
Geumupakat buat prang kafe
Hajat ate jak syahidan

Ureueng mukmin meunan pike
Bek teukeuse nibak Tuhan
Keumah pakat dum ka ase
Geubeudoh le seumbah junjongan

Sira beudoh geuhei sare
Tuanteu Ali bri ajaran
Kudeungo kah sahbat Nabi
Kameuungki raja kamoe

Nyang got jak woe bek le cakri
Meuhan mate bandua droe
Ban jideungo tuto singke
Jibeuet le cokma beusoe

Na peuet reutoh sigo mate
Jiek sabe miseue unoe
Bitpi dumnann ka hana le
Sang reuloh gle kiam bumoe

Ban geukalon jroh meuriti
Geutadi han jan jibet droe
Teutap sinan dum ka mate
Dum pupanji han soe puwoe

Peh bunyian kanan kiri
Hana sakri rioh bunyoe
Na sisa'at baro sunyi
Teuka lagi rakyat that doe

Teungoh jitren dum jiili
Rakyat rame sarat nanggroe
Ngon kawoh bandum di gaki
Bajee anti sok bak asoe

Peudeueng tumbak jipeunari
Peurise beusi mat di jaroe
'oh meusapat jihei sare
Nyum reuloh gle karam nanggroe

Rakyat le that hana sakri
Teungoh ili hana padoe
Nyang that utoh pahlawan Masyil
Yoh goh rame dilee som droe

'oh meusapat rakyat kafe
Jibeudoh le jijak sidroe
Han jan jiplueng meusipade
Abeh meugule bansinaroe

Beukah ulee puntong lihe
Rakyat kafe dum teupipoe
Siploh ribee sigo mate
Darah ilee mirah bumoe

Na sidroe-droe hana mate
Jiplueng sabe laju jiwoe
Meunan teuseubot kata rawi
Tuhanku Rabbi nyang thee sidroe

III. RAJA BADA PEUNGAT AYAH

Amma bakdu teuma lagi
Raja kafe lon hareutoe
Ban jideungo le that mate
Jipeugah le ureueng nyang woe

Raja Khandak saket ate
Jiyue pangge bujang meuntroe
Troh bak raja dum jili
Ampon doli raja nanggroe

Beudoh sinan le jititi
U bale bak intan pudoe
Rakyat geutanyoe le that mate
Pakri pike bujang meuntröe

Muploh ribee sigo mate
Kabed ngon Masyil poh dua droe
Pantahpi that tan seunabe
Bagoe suwe dalam uroe

Han jan leumah taeu lahe
Geutanyoe mate dum teupipoe
Bak akai han got tapike
Saleh pakri jeuet keumeunoe

Saleh bakjih eleumee sihe
Nyum di ate ulonteu nyoe
Bujang seuot teuma meunoe
Jipeugah le bak raja droe

Pahlawan tujoh tuanku pangge
Neuyue me le ngon jrat beusoe
Jiyue ureueng jak mudek le
Teuma ile bantujoh droe

Troh bak raja jipeugah le
Salen jibri bantujuh droe
Pakaian meuh intan pudoe
Sikin jibri lapan sagoe

Abeh jisalen dum barangri
Jiheï sare nyum lham nanggroë
Alat pupranganpi ka ase
Jibeudoh le bantujuh droe

Teuduek siat dilee kafe
Sahbat Nabi lon hareutoe
'oh troh keunan pahlawan Masyil
Jak meuteumee jak com jaroe

Ya Rasulullah idin neubri
Seukali lagi bak uroe nyoe
Brat that rakyat lon eu sabe
Tujoh kali nibak bunoe

Meuna umu Tuhan neubri
Esok hari lon jak sidroe
Meugoh meuteumee raja kafe
Kumeucang sabe geunap uroe

Ban neudeungo uleh Nabi
Beu Tuhan bri mangat asoe
Beungoh-beungoh pagi hari
Geuheï sare kiam bunyoe

Geutamong lam tantra kafe
Geupujoe le Tuhan sidroe
Meunoe geukheun dum di babah
Allahumma salli wa salem 'aloi

Geucok langkah geulhom gaki
Tuhanku Rabbi lom geupujoe
Allahummagfirli zunubi
Wali wa lidoi

Lheueh geupujoe Rabbon Alamin
Geupeunari cokma beusoe
Ban jikalon sahbat Nabi
Jimeuhei le peurab keunoe

Masa dilee le beurani
Nyoe hana le kueue sidroe
Jimeugrak-grak hana sakri
Jikap bibi jihing gigoe

Pahlawan tujuh nyang beurani
Ngon Zanggi nyang raya gigoe
Pahlawan tujuh kafe 'asi
Cokma beusi mat di jaroe

Ladom rakyat jime baci
Nyang rame jigulam camcoe
Nyang pahlawan jigulam beude
Nyang beurani cokma beusoe

Rakyat le that hana sakri
Nyang keutahwi Tuhan sidroe
'oh meusapat jihei sare
Nyum reuloh gle karam nanggroe

Soe nyang kalon gadoh pike
Nyum hana le malam uroe
Bitpi meunan le cit kafe
Kabed ngon Masyil ka lang han soe

Pahlawan tujuh meuhadap le
Jinoe mate gata dua droe
Jimupakat dumji sare
Kabed ngon Masyil deungo bunyoe

Dong meusapat geutanyoe bek cre
Mangat tarante ngon jrat beusoe
Hana jan troh jitiek rante
Abeh meugule bansinaroe

Tujoh ploh ribee sigo mate
Pahlawan kafe tinggai sidroe
Sa'at laenpi le mate
Uroe akhe rab ka sampoe

Geupéh tambo deungon geundrang
Rakyat riwang abeh jiwoe
Singoh beungoh lom jiili
Maken rame nibak baroe

Angkat-angkat jipeunari
Payong ceuradi kasab meureumboe
Rupa indah hana sakri
Raja kafe yue me keudroe

Peh bunyian kanan kiri
Han soe tukri le that bagoe
Sangkaikala ka meutiti
Ngon napiri rioh bunyoe

Rakyat le that lam hisabi
Limong kati rakyat sampoe
'oh meusapat jihei sare
Nyum reulon gle langet bumoe

Nyanpi geucang abeh mate
Han cit na gli kafe pindoe
Jipeusak dak jibloe mate
Nibak keuji 'aeb bunyoe

Leupah narit teulanjori
Jimeujanji yoh saboh roe
Meuhan mate Saidina Ali
Bak esteuri han le jiwoe

Meunan kalam dilee janji
Deungon doli raja nanggroe
Ngon pakaian salen jibri
Han tatukri peugah bagoe

Ija pinggang plang mupeulangi
Kreh ngon bari intan pudoe
Kupiah meuh meuceuradi
Taloe lihe yum sikatoe

Deungon bajee dum meureumboe
Peunoh asoe takalon hi
Deungon kawoh meuh seutaki
Dilee jibri bantujoh droe

Tujoh laksa beulanja jibri
Laeh lagi umong meuneugoe
Anek peurumoh dan esteuri
Dum raja bri bungong jaroe

Ganceng-peundeng jeuramani
Gleueng di kaki euncien di jaroe
Alat tuangan peuneugot Cati
Lheueh jiuke intan jipatroe

Nyankeu seubab jeuet jimate
Jipike guna saboh roe
Nyoe na saboh lon boh syae
Deungo akhi aduen adoe

Tamse bungong kacang keulandi
Di lua tangke di dalam taloe
Rupa indah hana sabe
Ayeuem putroe ti lam meuligoe

Uroe malam hana tom cre
Sret meugule bak siuroe
Bandua peue sigo han le
Putroepi mate bungongpi rugoe

Geumeusumpah seutia mate
Meunan di akhe dum barangsoe
Abeh haba rawi sahbat
Nabi Muhammad lon hareutoe

Jinoe beudoh Saidina Ali
Kabed ngon Masyil bansinaroe
Nyoepe hana ngon seunabe
Miseue beude tadeungo tuloe

Dikafepi hana sakri
Jiek sabe ban boh gandoe
Jidong meureuntang kana kiri
Jimeung rante ngon jrat beusoe

Jipreh troh Saidina Ali
Jinak hambo rante beusoe
'oh meusapat bandua si
Jipeusimban le kafe pindoe

'oh ban keunong Saidina Ali
Neutarek le deungon jaroe
Neutiek keudeh teuma lagi
Keunong kafe nyan tujoh droe

Abeh mubalot dumji sare
Jeuat keu bace kafe pindoe
Seubab raya mukjizat Nabi
Tuhanku neubri roh ateueh droe

Bitpi meunan hana that gli
Maken sabe lom jipeutoe
Gadoh ingat Saidina Ali
Neueu kafe le mupadoe

Zulfaka beusoe beurani
Hana sakri dalam jaroe
Hana jan lheueh jihei sare
Ulee ka cre sret u bumoe

Beukah ulee puntong lihe
Ladom reule gigoe-gigoe
Prang meucupheuek mate sabe
Darah ile sang lham-nanggroe

Ngon pahlawanpi hana le
Abeh mate bantuujoh droe
Nyang na udep jiplueng sabe
Nyang ka mate hana le woe

Troh bak raja jipeugah le
Ampon doli dumna kamoe
Rakyat geutanyoe le that mate
Pakri pike tuanku droe

Asai sampoe jicang reule
Di akhe han tinggai sidroe
Meunan leumah lon eu lahe
Nyang got bek le jeuet keu rugoe

Ban jideungo meunan haba
Hitam muka miseue adang
Jibeudoh dong peunap muka
Ngon suara meugurantang

Muka juah jiek bisa
Ngon mata han jeuet tapandang
Ate saket hana tara
Beungeh raya miseue biram

Abeh jicarot dum peutua
Di nap mata uleebalang
Tuto paleh keunoe kaba
Ngon kee raja kameuayang

Keupeue guna kah meulaksa
Ureueng dua han ek kacang
Han tom sigo nyang na padra
'oh noe masa ka kamuprang

Hana meusoe kubri nama
Biek aneuk da seuon idang
Meunan dilee ka biasa
Nibak ja ja inong mawang

Nyangkeu seubab jeuet ceulaka
Jiboh kada pangkat mawang
Meunan bandum taeu rata
Tuhá muda beusa seudang

Keupeue guna meuseutia
Meunyo hana katem meucang
Keupeue jeuet le pahlawan raya
Sep lam gop ceula han tom reunggang

Kumeurugoe ngon areuta
Kee nyoe papa tinggai sarang
Peue nyang hajat kameuhawa
Kujak mita kutueng utang

Kubri nanggroe keu bentara
Ngon areuta dum kupulang
Wase krueng deungon kuala
Laen teuma wase ladang

Kubri salen hana reuda
Ngon seunjata sikin panyang
Pakaian jroh bajee ija
Kasab sitra meukeurawang

'oh jan watee uroe raya
Kubicara sie bakmeugang
Saboh geusyik saboh kubri
Laen lagi uleebalang.

Keubeue lumo kujak mita
Bak kukira katem meucang
Anek peurumoh dum kaseuba
Di kee hana saboh panggang

Nyan dum di kee seutiaan
Nyang di kah han teuma ka sayang
Adat kuthee dumnoe rupa
Lon tiek lam paya umpeuen bubrang

Raja Khandak meunan kata
Raja Bada seuot rijang
Jimeukalam ngon ayahda
Jibet dua jaroe manyang

Ngon meuakai bijaksana
Ngon suara that meulumbang
Ngon beurani that peurkasa
Beuhe raya lom ngon tungang

Jipeuek seumbah ubak raja
Jidong sabda badan jeunjang
Ampon tuanku di jeumala
Lon aneukda gaseh sayang

Pakon tuanku sare subra
Peuebu sabda amarahan
Pakon neumarah di nap mata
Meusikada goh tamuprang

Meuka abeh neupumeureuka
Pane teuma ureueng muprang
Kadang aneuk ureueng tuha
Simasa han le jimuprang

Beukit tatueng ngon areuta
Jibungka han le jiriwang
Nyang jeuet paleh dum peutua
Jipeuraya buet sigupang

Meuka abeh dum jibungka
Pat taraja han le urang
Adat teukeudi teuka bahya
Tateubiet gata teuma u blang

Beukit tatem na cit nana
Kadang hana tajeuet meucang
Tatakot tinggai bungong seulanga
Dalam ceumara putroe seudang

Meuka mate hilang nyawa
Tinggai nama bungong karang
Nyankeu seubab jeuet ceulaka
Meuhana soe teubiet u blang

Keudroepe tan goppi hana
Pakri teuma rot meunang prang
Adat tatem pura-pura
Na silaksa ureueng meucang

Meuka jiba gata sama
Malee mata bak jiriwang
Kadang-kadang aneuk miet muda
Maken gura that guransang

Bek tacarot di nap mata
Malee raya uleebalang
Jikalee han tabri areuta
Meusuara bek that meulumbang

Nyan sa di gop geumeuseutia
Peue na tabri meusigupang
Adat na tabri sikrak ija
Han jikira nyawong hilang

Dumnan rakyat meuseutia
Di peutua han jisayang
Taparohjih tatueng areuta
Han takira jeuet keu lapang

Sidroe gadoh ureueng tuha
Mangat silaksa laen hilang
Beuthat beule keupeue guna
Ureueng donyan dum sibarang

Hana jitem tabri nama
Si ceulaka mita gupang
Meuseuki beuhe silgoena
Beuthat teuga bak geudubang

Meutan akai ube seuma
Keupeue guna beuthat tungang
Teuka di gop ureueng tuha
Ngon bicara mantong meunan

Beuthat geueh dalam tika
Ikot rata bandum muprang
Adat alang ngon beulanja
Jibri areuta lom jitumpang

Atawa na buet jisambe nyawa
Dumnan guna han tasayang
Patot taseuep di nap mata
Buet beulaga sang binatang

Di gop nyang na geupeulara
Di gata tarubeng sinan
Meuka jeuheut keupeue guna
Kon seutia buet tawayang

Nyang na di gop geupubeulanja
Geubri areuta dum sibirang
Meuka makmu le areuta
Tacok teuma keu pangkai prang

Meunan di gop geukeurija
Di gata talet ngon tacang
Tiep-tiep ureueng geupumeureuka
Geukira dilee bu panyang

Ngon peuleuheuen geubicara
Bek ngon sigra meugurantang
Walee salah jimeudeesya
Bek antara meukreueh ceukang

Teungoh na buet han geukira
Singoh lusa adat geuriwang
Geupreh dilee siklep mata
Meuseuki tasula akhe datang

Tapeutakot meusikada
Pura-pura takheun tacang
Untong-untong jitem saba
Bek biasa aneuk jalang

Adat meuteumee jih ngon gata
Singoh lusa kadang kadang
Tageureuhem pura pura
U muka bek cit tapandang

Nak teumakot bek biasa
Meunan keurija uleebalang
Meuna umu jih ngon gata
Kadang teuma jroh meuriwang

Meuka mate tapufana
Kon seutia akhe datang
Teugo jinoe ka ceulaka
Dilee gunajih ube blang

Meunan sinan sajan gata
Singoh lusa lom tapandang
Meuka jitu'oh akai bicara
Simasa han le jipantang

Peue nyang tayue jimeudawa
Maken lanja meutamah girang
Walee jitem lom tamaba
Keupeue guna han le guransang

Adat jijak pura pura
Meukeutanda undang-undang
Yoh di gampong sama-sama
Troh u lua jieh lam drang

Han jan tangieng siklep mata
Jiwoe lanja le jiriwang
Beukit tatanyong tapareksa
Pakon di gata tawoe rijang

Hana jan troh kaki kuta

Meunan bicara buet han reumbang

Ampon tuanku barang sabda

Bunoe hana deuh neupandang

Bukon ulon aneuk dara

Bukon hana kujak meucang

Meuka lon jak po meukuta

Han kukira nyawong hilang

Nakeu jinoe nyang ka tuha

Yoh muda han tom kuriwang

Lagi sajan poteu raja

Walee hanapi kumeucang

Meunan jipujoe di nap mata

Tuto seunda jipeuayang

Ureueng bingong kheun seutia

Nyang na bicara kheun peuayang

Lah jitakot that keu gata

Sambat seutia mubek alang

Bek takirajih kreueh jungka

Abeh nyang na laen ceukang

Beu na pike ureueng tuha

Jipubla meuka bek irang

Nyang baten soekeu na tuban

Lahe saja got tapandang

Seubab tareubot hana reuda

Nyankeuh punca han soe muprang

Keupeue guna kapai raya

Meuka hana malem sarang

Teuka bade angen raya

Sigo saho timpa tihang

Keupeue guna le areuta

Meuhana soe me seunapang

Dilee keu gop han takira
Jinoe keu gata pane jisayang
Adat buet bacut tapeuraya
Han takira teuhah pinggang

Tameukeusud meuareuta
Ngon syeedara beuthat reunggang
Beuthat beungeh geuseurapa
Buet kon jeumba peue talarang

Jinoe nyang le dum peutua
Jikeurija buet han reumbang
Uroe malam jiusaha
Jimeujaga sit keu gupang

Pakri han sidroe jitem kaya
Jireubot atra hana reunggang
Meutan hareukat ube seuma
Pane teuka sret di manyang

Meuatra gop padumkeu na
Meukon atra hareukat tulang
Hana jan lheueh taseumula
Jiyue teuka jak me umpang

Jeuep-jeuep sagoe tadeungo subra
Bangon rupa ureueng meucang
Han jitupeue keunak bri le
Seubab pade mantong di blang

Nyang na pateh haba peusuna
Han takira jeuet keu irang
Peue meusaket di ureueng donya
Meujitueng na di jih gupang

Adat na saboh kapai teuka
Ateueh kuala jidong kuangkang
Meudilee-dilee ek peutua
Geujak mita ase sigupang

'oh troh lam kapai meuteumee Cina
Teungoh subra basa cong cang
Han jan putoh meuhareuga
Wase kuala laju tamakan

Meunan bagoe adat raja
Bak Cina lakee meuutang
Singoh-singoh han jiteuka
Teuboh kuala jeuet keu suang

Keupeue keude dua banja
Meuka hana kapai datang
Peukan seumak timoh drang jawa
Abeh jibungka ureueng meuladang

Adat le aneuk han peue kira
Maken ceulaka meutamah suang
Jicok lam keude barangpo atra
Jikheun hareuga 'oh woe tungkang

Meunan umu kapai teuka
Kubri keu gata dua pucok tihang
Adat han jibri jimeudawa
Jitampa laju jibangkang

Nyang lam gampong han peue kira
Ban ie raya ka saboh blang
Han jeuet meuaneuk tapeulara
Dumnann ceulaka uleebalang

Siuroe tujoh go teuka geumpa
Ngon khueng raya han tom reunggang
Abeh deuk troe ban saboh donya
Ngon areuta lom teusagang

Takira na jeuet keu laba
Han takira jeuet keu suang
Kadang meuteumee sama dua
Han jan tagisa jitop meutihang

Meunyo aneuk ureueng tuha
Han jikira tinggai gampong blang
Meudumnan buet keupeue guna
Kon teusia uleebalang

Meusigo salah ureueng donya
Tasaba dilee bu panyang
Yoh goh tapoh bek taceula
Bek nyang pada tapeutimang

Meuhan meunan tabicara
Rogoe raya akhe datang
Meunan nyang ka taeu rupa
Dalam donya dum tapandang

Tiep-tiep ureueng meukeurija
Han geukira talo meunang
Baranggapeue buet takeurija
Ban neuraca tapeutimang

Walee salah buet aneukda
Tapeusa ngon ureueng landang
Meukon meunan takeurija
Meuhad ceulaka akhe datang

Meutan akai ube seuma
Keupeue guna uleebalang
Lah ka di nap jikheun raja
Di likot gata asee musang

Meunan narit Raja Bada
Di nap peutua uleebalang
Sajan meuntroe ngon beuntara
Ngon suara that meulumbang

Hana sidroe jeuet meututo
Teuduek tahe miseue batang
Raja Khandak miseue mante
Bibi keundo lidah ceukang

IV. ABEH BINATANG JIKRAH JAK NGAZA

Bahkeu dumnun aneuk ngon ku
Amma bakdu lon peuriwang
Raja Bada teungoh meututo
Maken laju that guransang

Jeuep-jeuep nanggroë dum jibri su
Jiyue palu gong ngon geundrang
Abeh teuka dum meu'u-u
Han jeuet taeu ka mirah blang

Hana putoh jitren laju
Rakyat le han putoh reuntang
Ngon alat bandum di baho
Peurise le ngon geudubang

Leumbeng kampak dum meurungko
Han jeuet taeu miseue jeundrang
Nyang pahlawan beuhe beuhe
Jipeh tambo deungon canang

Langet bumoe sang meugo-go
Han jeuet tadeungo sang nyum mumang
Tamse bade tren meu'u-u
Ban ujeuen sret nyan di manyang

Makhluk Allah tahe gante
Han jeuet jipo cicem teureubang
Duroh bulee dum teupeuro
Abeh pungo dum binatang

Sang kiamat nyum ka hanco
Bumoe meutoto langet meuguncang
Seugala binatang abeh sosah
Hana saboh jeuet teureubang

Meumpeuen han jeuet le jicoh
Badan awoh tinggai sarang
Nyankeu bagoe ka lon peugah
Le that ulah 'oh tapandang

Raja Bada raya syeekah
Nanggroe ulah le that urang
Jeuep-jeuep gampong abelr jikrah
Jak peuseumah uleh bujang

Teuka rakyat han peue peugah
That barollah ka peunoh blang
Ngon seunjata han peue peugah
Keumurah beude seunapang

'oh lheueh jipeh ateueh larah
Jitatah teumaga loyang
Keumurah beusoe raya babah
Aneuk timah dum meukarang

Di pusat ubat jibicah
Dalam babah awe sunsang
Nyang beude cut raya larah
Aneuk bagah jiteureubang

Di pusat baro meusinggah
Di babah sideh ka reunggang
Ngon pahlawan meugah meugah
Ateueh gajah dum jipasang

Ceumeuti beusoe jimat siblah
Keumurah jilhat di pinggang
Bak tangkulok beusoe meuklah
Bajee mirah di beulakang

Mise leubat bandua blah
Galak leupah soe nyang pandang
Soe nyang kalon teuhah babah
Hebat leupah aneuk jalang

Ngon teuga na saboh gajah
Beukit jiplah gunong lapang
Pura-pura got keumurah
Jimeureupah seunda wayang

Ngon peurasan han peue peugah
Nyum-nyum beukah baloh geundrang
Ureueung meunari cidah cidah
Inong jariah seudang seudang

Suara mangat rupa cidah
Nyum meuriah 'oh tapandang
Nyang keumalon han peue peugah
Teudong meuseueh ban pupalang

Dalam kuta peunoh limpah
Rakyat barollah dum ka datang
Peudeueng alat dum geukeubah
Keumurah beude seunapang

Beudoh rakyat dum meukeumah
Geusimplah ija geupinggang
Jaroe manyang ulee reundah
Peuek seumbah uleebalang

Nibak raja turon titah
Geuyue peugah ek u manyang
Geubri teupat indah indah
Ban kaidah uleebalang

Nyang rakyat teuduek di bawah
Nyang meugah u bale keumang
Geuleueng tika bandua blah
Geukeubah ngon bantai keurawang

Teupat indan dum meutatah
Ngon meuh mirah lheueh jituang
Jeuet taloh droe sang nyum leumah
Hu sang basah deuh mubayang

Bak tiek jaroe lhat kupiah
Bandua blah meuneureupang
Nyang rot ateuh meuh meutatah
Di bawah pirak keurawang

'oh takalon that meusyeekah
Bak duek tufah uleebalang
Ngon tingkap bandum geupeuhah
Angen tampah keunan datang

Soe nyang kalon teuhah babah
Jroh that indah bale keumang
Pasoe ranup dalam karah
Buet jariah ngon dendayang

Jipileh nyang kuneng indah
Nyang mirah bandum jibuang
Jikoh tangke bandua blah
Jikeubah bandum jibuang

Lheueh jisunteng jiboh keumpah
Dalam karah sang jilinggang
Tuan putroe peurumoh raja
Utoh raya bak keumarang

Lipat ranup jisom punca
Tangke hana deuh tapandang
Boh di dalam bakong meulila
Gapu naga dum jiruncang

Lheueh nyan jiboh pineung muda
Jiboh teuma bungong lawang
Jigantung ban siseun lingka
Ngon sutra bandum jikarang

Di teungoh-teungoh bungong meucula
Rot lua keureutah neucang
Keu pucak bungong peureuda
Hu meucahya 'oh tapandang

Rupa indah hana tara
Ladat mata soe nyang pandang
Dumnan bangon peurasan raja
That mulia uleebalang

Sira meuduek geumeuhaba
Seun sibanja le ka leukang
Abeh ranup dum geurata
Geubet kahwa dalam idang

Beuet jaroe ureueng tuha
Peurdana raja that meulumbang
Rupa hebat badan raya
Bideueng dada na ube blang

Tujoh ploh hah ija sutra
Han seb punca mantong reunggang
Nyang raya that aneuk mata
Bube raga siploh gantang

Nyang leupek pruet got that raya
Meuadoe a ngon geulumbang
Bulee keuneng panyang raya
Jeuet taputa keu seumurang

Lam geulunyueng reuhung raya
Lot taba guda sikawan
On keutupong nyang that raya
Ube banda kuta Midan

Deungon idong han peue kira
Luah raya ban geulanggang
'oh jan watee na keurija
Tangkulok raya tujoh ha bidang

Pakaian jroh bak anggeeta
Kasabsutra meukeurawang
Bipi meunan mantong muda
Tujoh ploh raja ka jipandang

Nyankeu sidroe ureueng tuha
Nyang biasa bak meuidang
Lheueh minoman ngon ie kahwa
Uroe asa rab ka peutang

Geuyue bri bu dum peutua
Bansineuna panglima prang
Ladom rakyat bu lam raga
Ladom teuma lam on pisang

Ureueng meugah sidroe dua
Maseng kada dalam dulang
Beuet jaroe ureueng tuha
Miseue nyang ka geupeutimang

Lheueh minoman dumgeu rata
Bet u lua pinah idang
Lheueh mugreb seumbahyang isya
Duek mubanja dum meureuntang

Sama teungoh Raja Bada
Ban seulingka panglima prang
Buet puprangan geubicara
Nyang seutia uleebalang

Nyang meututo Raja Bada
Laen teuma dum sibirang
Beuet jaroe bak peutua
Ngon suara that meulumbang

Tuto mameh na dum saka
Miseue gula ban meulisan
Soe nyang deungo ro ie mata
Gaseh teuka timue sayang

Dua tangan di jeumala
Meunoe kata jikheun rijang
Nyang kuseutot dumna gata
Bansineuna uleebalang

Adat na gaseh keu syeedara
Raja Bada tatiek u blang
Lheueh takeubah dalam tantra
Tawoe gata bahle gop cang

Nibak malee keuji nama
Bahle fana nyawong hilang
Meuka keuji keupeue guna
Jeuheut gata uleebalang

Nyankeu sagai ulon publi
Nama gata dum bek irang
Bek antara rugoe areuta
Tinggai donya han lon sayang

Meunan narit Raja Bada
Di nap peutua uleebalang
Adat saket dalam dada
Di lua sang boh peudeundang

Saket mangat hana nyata
Utoh raya thatji sang-sang
Abeh haba Raja Bada
Marit teuma uleebalang

Peurdana meuntroe ureueng tuha
Bijaksana that meulimbang
Ampon tuanku barang sabda
Rugoe laba kamoe julang

Adat langet sret u donya
Ngon keupala ulon tumpang
Pakon meugriet tajak gata
Kamoe nyang na gohlom meucang

Kamoe laen mantong dumna
Pakon gata teubiet u blang
Meuka mate poteu raja
Keupeue kamoe soe peutimang

Teuboh keurajeuen atueh donya
Ngon agama han le seunang
Pike dilee po meukuta
Nyang got saba rijang-rijang

Meugoh mate kamoe nyang na
Nyang raja han lon bri u blang
Bahkeu dumnun bek le laku
Meule tuto jeuet keuwayang

Nakeu sidroe Ali Murtala
Adat silaksa han kupantang
Nabi Muhammad kujak mita
Ureuing nyan dua bah kamoe cang

Meunan jikheun dum peutua
Di nap mata duek meuteumtang
Phon seunja kon geumeuhaba
Hingga jula datang siang

Simalam beungoh geumeuhaba
Bansineune uleebalang
Beungoh uroe teubiet faja
Abek haba pakat muprang

Abek narit ngon peutua
Jibri haba jeuep binatang
Raja Bada raya tantra
Hekeumatpi na dum sibarang

Binatang kleuet dalam rimba
Bansineuna ek jigeunggam
Hana saboh jeuet meudawa
Jiepeuhamba dum binatang

Jeuep-jeuep gunong jiseuranta
Pat na guha teumtang binatang
Badeuek gajah rimueng singa
Asoe rimba dum sibarang

Saboh bagoe biek kawom kra
Eungkong raya panglima prang
Maseng-maseng dum peutua
Saboh raja sidroe bujang

Nyang biek cicem jisama-sama
Siwah raja kleueng teureubang
Nyanpi sidroe biek nyang raya
Saboh tantra di raja ngang

Nibak laen dum peutua
Raja gagak sia mambang
Seugala binatang jih nyan raja
Ngon geureuda uleebalang

Peulandok kance le bicara
Waki raja aneuk jalang
Raja Bada raya tantra
Binatang rimba jeuet jipeucang

Laot darat jiseuranta
Bansineuna dum binatang
Nyang lam tanoh sidom bisa
Di laot raya uleue biram

Nyang dalam krueng raja buya
Dalam paya meuntroe bubrang
Saboh kawan biet keukura
Binatang rimba raja dandang

Saboh sagoe limpeuen ngon kala
Saboh jeumba nyang biek ganggang
Biek beujabak ngon meurua
Sama-sama peudeueng panyang

Seugala binatang dalam paya
Nyang peutua panglima prang
Lagi tarek hana haba
Keurajeuen raya dalam kubang

Saboh kawan raja naga
Saboh bangsa jen edeurang
Maseng-maseng na peutua
Ngon peurdana uleebalang

Miseue ureueng manusia
Meunankeu tantra dum binatang
Jitaklok bak Raja Bada
Binatang rimba dum sibarang

Jeuep-jeuep gampong abeh teuka
Maha raja uleebalang
Langet meutoto bumoe geunta
Binatang rimba dum teureubang

Han lon tupeue peugah rupa
Le that bangsa dum binatang
'oh meusapat dum sineuna
Nanggroe donya dum meuguncang

Jidong di nap Raja Bada
Bansineuna dum binatang
Peulandok kance ureueng tuha
Peurdana raja nyang meulimbang

Ampon tuanku ateueh jeumala
Binatang rimba dum ka datang
Peue na hajat po meukuta
Peugah sigra rijang-rijang

Saket rugoe deungon laba
Peugah sigra ampon jeunulang
Meuka sudah dum bicara
Mangat meugisa dum meuriwang

Pajan meukeusud ulon teuka
Po meukuta keunoe rijang
Sangkira trep jeuet keu jula
Neubri haba bek meuayang

Ban raja deungo meunan kata
He po waki jakleh riwang
Meuna umu beu rijang teuka
Hajat guna heundak muprang

Han peue salah po meukuta
Ban nyang hawa ulon meucang
Peulandok paleh le bicara
Jipeungeut raja jipeuayang

Abekh kalam deungon raja
Teuma jigisa dum jiriwang
Lheueh abekh woe binatang rimba
Raja Bada pangge bujang

Pangge nujum eu kutika
Jimeujaga uroe malam
Jibuka tik jilop patra
Jeuep-jeuep banja dum jipandang

Raja kafe pane teuka
Uleue naga ho jiriwang
Beukit leubeh tinggai esa
U antara naga jipandang

Keunong ngon jifam reumbang kutika
Dua ploh dua phon tamuprang
Meunan nujum kheun bak raja
Di nap mata duek meuteuntang

Ban jideungo jroh kutika
Raja Bada yue tet simban
Jitet sigo beude raya
Mangat teuka dum binatang

Mangat meuthee seugala donya
Bansineune uleebalang
Ban jideungo that meutaga
Binatang rimba dum teureubang

Laen nibak nyan ureueng donya
Bansineuna uleebalang
Dua katoe sikureueng laksa
Manusia kon binatang

'oh lheuëh abeh rakyat teuka
Raja Bada jak u padang
Pakaian jroh bak angeeta
Kasab sutra meukeurawang

Ateueh ulee kulah kama
Sok bak dada bajee geutang
Dokma sajan dua banja
Intan meutia meukeurawang

Jroh pakaian hebat rupa
Keunan mata dum sibarang
Soe nyang kalon ladat mata
Jroh that rupa aneuk jalang

Kawoh kaki meuh suasa
Bandua meueh meukeurawang
Taloe lihe bungkoh sutra
Kasab diwangga meukeurawang

Bak jaroe uneun peudeueng panyang
Kreh meudulang lhat bak pinggang
Ngon meuh uke dum jiteumpa
Piala mundak meudulang

Seupoh mirah hu meunyalah
Ngon mata intan meukarang
Ngon pinggang plang ija sutra
Jroh that rupa meukeurawang

Lhat peurancong punca ija
Teuma jigisa kreh meudulang
Jimeukandran ateueh rimueng
Ngon peudeueng saboh jisandang

Rupa indah tamse buleuen
Keureubueng di rueng ban guda plang
Banduapi jroh meurancong
Bak geulunyueng tamse subang

Peulana meuh lom nibak rueng
Bak reukueng geunta meukarang
Ngon iku jroh meualam lulon
Bak ujong lagee mubintang

Lisekpi that tamse ureueng
Sang kon rimueng 'oh tapandang
Raja Bada rupa useueng
Ateueh rimueng tamse mambang

Pantahpi that hana peue kheun
Tamse bangon cicem teureubang
Badeuek meueundram nama peudeueng
Mat di uneun sang seulayang

Rakyat le that tamse neleueng
Ladom ureueng ladom binatang
Ngon peurasan han tom kureueng
Sabe kram-krum hana reunggang

Ladom geundrang nyang ladom gong
Ladom momong ladom canang
Han jeuet tadeungo su meukhung-khung
Tuloe geulunyueng sang-sang mumang

Sang-sang canang sang-sang tambo
Syam-kasyum sye meusu geundrang
Sang-sang suleng sang-sang beureugu
Sang meugo-go sang meucrang - crang

Sang-sang na ban deungon muri
Sang meunduli sang su gambang
Sang ceuracap sang keucapi
Sang napiri sang su canang

Sang hareubab sang keudangdi
Sang meuti-ti sang meutang-tang
Peurasan le banyak muri
Raja kafe teubiet u blang

Saboh kawan di sipai
Saboh bagi panglima prang
Nyang pahlawan jikap bibi
Nyang beurani sangat girang

Jimeugrop-grop hana sakri
Mangat ate sang-sang meunang
Sira jijak jihei sare
Rab ka hampe u geulanggang

Rakyat le that hana sakri
Peurasanpi that meuguncang
Ammabakdu dudoe nibak nyan
Muwoe karangan Ali Murtala

Tuanteu Ali bak uroe nyan
Hana sajan ngon Saidina
Neujak sidroe neubeurjalan
Neucre kawan tinggai tantra

Nakeu watee seumbahyang leuho
Neudeungo meugo-go that meutaga
Sang-sang kafe nyum teusawo
Bah kujak eu siklep mata

Neusaleuem le rijang-rijang
Lheueh seumbahyang ek cong guda
Ban neutepok di beulakang
Jiteureubang dalam tantra

Guda jiplueng sang meulayang
Na nyum sang-sang troh lam hawa
Teungoh teungoh neupeusimban
Mupandang ngon Raja Bada

Ateueh rimueng jimeukandran
Di tangan peudeueng nyang raya
Uleebalang meuntroe sajan
Ngon pahlawan troh meulaksa

Laen nibak nyan han tatuban
Dum binatang dalam rimba
Ban jikalon tuanteu Ali
Jitieik rante jeue meulila

Han jan neuweh meusipade
Keunong lihe le meusingkla
Bitpi dumnan nyan hana gli
Neukoh rante ngon zulfaka

Hana sapeue teuingat le
Neucang sabe neupet mata
Na lhee ribee nyang ka mate
Pahlawan kafe Raja Bada

Bitpi dumnan ka hana le
Jiek sabe dum boh panta
Dumnan neupph han ek lapang
Tamse jeundrang rakyat that bha

Teungoh jiek dum meureuntang
Uleue biram limpeuen kala
Tuanteu Ali nyang guransang
Han ek neucang meunyum lia

Ban neukalon le binatang
Neuriwang bak Nabi kita
'oh lheueh neucom jaroe gaki
Neupeugah le sagra-sigra

Neupeuek seumbah ubak Nabi
Tuanteu Ali duka cita
Ya Rasulullah ya habibi
Saleh mate lon meelana

Raja Bada kafe laknat
Le that rakyat nyoe ho teuka
Han tom lon eu siumu drat
Miseue lalat le lagoena

Siumu jeuet lon mat peudeueng
Han tom lon kalon meunan rupa
Seugala binatang asoe gunong
Badeuek rimueng abeh teuka

Jeuep-jeuep nanggroe nyang ka lon prang
Han tom meunan rakyat that bha
Han tom kieu le binatang
Uleue biram limpeuen kala

Abah teuka dum sibirang
Binatang nyang bisa bisa
Wallahu a'lam sang syubeuhah
Peurintah kudrat Tuhan Esa

Dalam ate meunan labat
Saleh mawot lon meelana
Bak takalon dali adat
Hana dapat lheureu u lua

Bitpi meunan hana meuhad
Buet hakikat han troh duga
Beukit meunan ya Muhammad
Nyoe amanat lon bak gata

Beukit mate ulon jicang
Akhe datang saboh masa
Meuka han le neuueu diblang
Got neuriwang ya meelana

Meuka mate ulon tuan
Kafe jahnam han soe ngaza
Bek teukabo lon bak Tuhan
Di bawah nyan Nabi kita

Hana sidroe laen lawan
Meulaenkan Ali Murtala
Nabi seuot teuma nyoeban
He intan beu mubahgia

Bek tatakot aneuk badan
Sibagoe nyan han binasa
Meuna tulong Khalekon Alam
Kafe jahnan tapufana

Teungoh teungoh bri ajaran
Tren fireuman Allah Ta'ala
Nibak Tuhan Po Nyang Ahad
Keu Muhammad Nabi kita

Tren Jebrai bak Muhammad
Fireuman halarat neucalitra
Ya Nabiyullah fireuman Tuhan
Neuyue iman ubak gata

Bek tatakot kafe jahnam
Poku Tuhan tulong gata
Meuna umu Saidina Ali
Tathee mate bansineuna

Khieng dum nanggroe sama seukali
Hanyot bangke ban ie raya
Meunan fireuman nibak Tuhan
Neuyue peugah ban ubak gata

Nabi seuot isnya Allah
Ban nyang titah Tuhan Esa
Ban neudeungo meunan titah
Lakee meu'ah teuma gisa

Tinggai sinan Nabi Muhammad
Sajan sahbat dum seugala
Lheueh neuriwang malaikat
Nabi Muhammad neumeusabda

Neupeugah bak Saidina Ali
He boh ate jak tangaza
Ban geudeungo sabda Nabi
Mangat ate dumgeu rata

Beudoh rakyat dum peureugi
Jak ngon gaki ladom unta
Kabed ngon Masyil uleebalang
Ateueh guda plang nyan bandua

Tuanteu Ali panglima prang
Guda teureubang ka meusaja
Sira geujak geuhei sare
Deungon Nabi di ateueh runga

Rupa indah hana sakri
Unta peulari pantah raya
Ulee iku meuceuradi
Di gaki kawoh meulila

Wareuna bulee miseue nuri
Sang geusyahi bak angeeta
Di ateueh rueng saboh peuratah
Hana luah na sideupa

Rotdeh rotnoe jroh sileupah
Bandua blah got that rupa
Bak teumpat duek Rasulullah
Jroh that indah miseue geuta

'oh takalon that meuugah
Hana ubah sang syeuruga
Teuduek haba Rasulullah
Muwoe kisah Ahlon Asma

V. RAKYAT SEUREUPHA RAJAPI MATE

Suroh Tuhan Po Nyang Ahad
Malaikat tren u donya
Geubri keu ngon Rasulullah
Gaseh Allah Tuhan Esa

Ateueh bumoe hana teumpat
Le that rakyat Ahlon Asma
Neujak bantu Nabi Muhammad
Meunan riwayat Nabi kita

Teuduek 'oh nan siblah rambat
Lon hikayat nyang keudua
Amma bakdu nyoe nyang baik
That ceureudek nibak nyang ka

Raja Bada rupa cantek
Geudubang tarek hana ngon sa
Ban jideungo suara deumpek
Jitarek busu teumaga

Jimat di wie peudeueng leuntek
Nyang baik ulee suara
Rakanpi jroh sabe sabe
Banduajih sang geujangka

Umu baro sang sirungke
Sabe sabe muda muda
Jiek cundrong santeut ulee
Ek meuree-ree ban silaksa

Saboh kawan siploh ribee
Nyang jak dilee Raja Bada
Di sinanpi hana lagee
Meuhee-hee na dum geulawan

Tuanteu Ali panglima prang
Ka mupandang ngon Raja Bada
'oh ban leumah deuh jipandang
Jibet manyang peudeueng raya

Ban neukalon jikeumeung cang
Neukheun rijang bek meuseunda
Kafe paleh bek meuayang
Nyang got riwang jakleh gisa

Ban jideungo neuyue riwang
Miseue biram jiek bisa
Raja Bada that guransang
Rimueng seudang bueh lagoena

Tuanteu Ali panglima prang
Peudeueng panyang hu ban sua
Ban jikalon neukeumeung cang
Jigrop manyang ban cempala

Han jan leumah deuh tapandang
Ka meuriwang le bak nyang ka
Nam tujoh seun meuulang-ulang
Han ek keunong si ceulaka

Hana saho tiwah meunang
Sabe timang bak seunjata
Ban neukalon han ek leukang
Neukliek meudeungong that meutaga

Na lhee ribee sigo neucang
Nyang mumangpi na silaksa
Tamse suwe meuhayak ulee
Ladom lagee ureueng gila

Neupet mata laju neucang
Leupah jeumeurang dalam tantra
Saboh sagoe hana lapang
Dumnan neucang ka meulaksa

Raja Bada that analan
Jroh that rakan meuseutia
Hana jarak bandum sajan
Bitpi dumnan ka jirasa

Saidina Ali nyang pahlawan
Nyang le rakan Raja Bada
Jiek cundrong jroh meurumpan
Neudapan u dalam tantra

Na lhee ribee rakyat neucang
Keumeung lawan blah utara
Ban jikalon ka meuriwang
Jiek reumbang Raja Bada

Ateuh rimueng jimeukandran
Nyang rakan di ateuh guda
Teungoh jiek dum meureuntang
Ban saboh blang sang ie raya

Tuanteu Ali that guransang
Maken neucang hana tara
Ho neupeukeue abeh lapang
Jiek meuguncang leubeh bak nyang ka

Tamse angen larat laot
Raya ngon cut hana bida
Keu mate hana jitakot
Keu mawot hana jikira

Nyang mate tinggai di likot
Miseue ribot jiek lanja
Hana sidroe nyang na teumakot
Jiek santeut dumji rata

Rakyat muprang mupalot-palot
Ban lheueh meulet ngon cempala
Uroe nyang trang nyum ka seupot
Keulam-kabot miseue ka seunja

Bak guda plueng that meukalot
Abee jipot u antara
Suara peudeueng bunyoe guroh
Seun sireutoh rakyat fana

Jiek laju hana teudoh
Keunan jibloh lam seunjata
Rotnoe cokma rotdeh camcoe
Jimeukiloe hana reuda

'oh meuteumee sabe beusoe
Teubiet apui hu meunyala
Rotdeh rotnoe hana peue kheun
Meuron-ron seun-seun nam deupa

Rotnoe kapak rotdeh busu
Tadeungo pra-pru ban seulingka
Rakyat mate dum teudu-du
Jimeueundru hana reuba

Hana sapeue teumakot kuyu
Han sigeutu ate lia
Deungon rakan kandum meulaku
Le that bantu Raja Bada

Rotnoe kapak rotdeh leumbeng
Keutang-keuting teupeh mata
Tuanteu Alipi sang gigeng
Neugancang u teungoh laksa

Neucang kafe neukeulileng
Meupuseng-puseng bagoe jeureukha
Raja Bada badan leunteng
Rimueng kureng bueh lagoena

Ban jikalon rot geunireng
Jigrop leunteng pantah sigra
Jimeusapat jak rot likot
Ngon jeue kadot jigeulawa

Tuanteu Ali roh lam peungeut
Silap bacut ka meusingkla
Ban jikalon ka meucarueh
Jiek u ateueh na silaksa

Tuanteu Ali neubeuet seuleusoh
Lhee seun neupruh bak angeeta
Deungon tulong Tuhan utoh
Abeh luroh dum meuleua

Tuanteu Ali jikeumeung poh
Beusoe keuneukoh sahbat Saidina
Nakeu rante nyan ube broh
Rimueng nyang bueh ek neutampa

Lagi raya gaseh Tuhan
Ngon junjongan Nabi kita
Han jitukri mita jalan
Pahlawan Ali Murtala

Ka jipeugah nyoeban akhe
Binatang gle teuma teuka
Jijak peungeut raja kafe
Mangat ate dumji rata

Surak deumpek jihei sare
Jidong meuriti ban seulingka
Raja Bada bri mufeuti
Peulandok kance seuot sabda

Nyang rot barat gajah balohan
U timu nyan gajah singa
Teungoh jiek dum meurumpan
Sajan Sulotan Raja Bada

Di timu laot uleue biram
Seudong bangkong barat daya
Teungoh jiek dum meureuntang
Sang pupalang ban seulingka

Siblah barat jen edeurang
Di raja ngang blah tungara
Nyang di ateuh raja mambang
Di barat nyan raja naga

Sama teungoh tuanteu Ali
Rakyat kafe ban seulingka
Ban neukalon jroh meuriti
Neutadi seun-seun-dibanja

Han jeuet jiweh meusipade
Abeh meugule dum meutimpa
Nyang le mawot binatang gle
Abeh mate dum meulaksa

Bitpi dumnan ka hana le
Meugantoe sabe laen teuka
Han jan mate siteungoh bagi
Ka jiili na lhee laksa

Meusigeutu hana sunyi
Dumnan mate ka meulaksa
Baranggasoe hayut ate
Binatang gle le lagoena

'oh neukalon tuanteu Ali
Nyum-nyum han le lheueh u lua
Meuna tulong nibak Rabbi
Neucang sabe miseue nyang ka

Zulfaka peudeueng analan
Di tangan neugisa-gisa
Bitpi dumnan le angkatan
Hana meujaan lheueh u lua

Abeh neupoh dum neusimpan
'oh mate nyan laen teuka
Dumnan mate han jitakot
Miseue ribot dum jiteuka

Tuanteu Ali pantah ban ribot
Meuhuet-huet sang bade raya
Ho nyang neuse keunan neugrop
Sapat-sapat seun silaksa

Nyang rot di nap mantong meukalot
Di likot laen ka teuka
Meusigeutu hana kuyut
Nyan sa mawot ka meulaksa

Rotdeh rotnoe jimeugrop-grop
Nyum rasa sret bumoe donya
Ngon jisurak rame-rame
Jiek laen ban seulingka

Hana putoh jihei sare
Meugule-gule laju teuka
Tuanteu Alipi han lale
Neucang sabe hana reuda

Zulfaka peudeueng meutuah
Bak seumajoh sang geureuda
Hana jan toe keunan musoh
Di jeuoh sideh ka fana

Cokma beusoe neumat siblah
Nyang meugah na brat sigunca
Barangadum han ek jigagah
Rimueng gajah dum neutampa

Di sinoe baro meusinggah
Sideh reubah seun silaksa
Han jan meusurot meusilangkah
Ban meurimbah ka seureupha

Tuanteu Ali pantah han soe
Neuseudoe seun-seun silaksa
Hana teudoh sabe neucang
Kafa jahnam le that fana

Rakyat mate dum teupipoe
Darah meulangoe ban ie raya
Hana neuheh uroe malam
Minom makan tan neurasa

Baranggajan sabe meunan
Dalam kawan kafe ceulaka
Rasulullah sinan sajan
Bak uroe nyan buet neungaza

Laen nibak nyan teuma rakyat
Nyang le that Ahlon Asma
Cokma apui bandum alat
Masyil ngon Kabledpi sajan na

Raja bada kafe laknat
Han jikakot bube seuma
Ban jikalon Nabi Muhammad
Jipagat ban siseun lingka

Jiek laju dum jikarat
Jitiek ngon jrat ateueh Saidina
Teukeudi Tuhan limpah kudrat
Malaikat neujak publa

Neucok batee Nabi neumat
Lheueh meungucap istigfara
Lheueh neupujee Allah Ahad
Neusrom leugat hana reuda

Keunong batee dum muphat-phat
Kafe laknat le binasa
Tulong Allah limpah kudrat
Seubab mukjizat Nabi kita

Nakeu baro keumeung sampoe
Si di barat blah utara
Na siteungoh ka beh jahnam
Bak uroe nyan tamong agama

Nyang ladom tem nyang ladom han
Tan salahan bak calitra
Teuduek siat nyang haba nyang
Muwoe karangan binatang rimba

Abeh jitaklok bandum keunan
Bak junjongan Nabi kita
Laen nibak nyan dum barangri
Bak kafe mantong jimeutha

Binatang gle nyang peuet kaki
Jak bak Nabi laen hana
Nyang jak dilee lem po waki
Peulandok kance ureueng tuha

Jipeuek seumbah hana sakri
Siulah ri manusia
Ban meuteumee deungon Nabi
Jijunjong le sigra-sigra

Nabiyullah ampon kami
Baranggari tuha muda
Raya salah lon bak Nabi
Lom lagi ngon Tuhan Esa

Neupeuampon ya habibi
Di yup kaki ya meelana
Teureutib meujeulih han lon tukri
Binatang gle dalam rimba

Tamse mante tren di gunung
Hana keunong dum peukara
Eleumee lon tan akai bingung
Nanggroe tunong jeuoh banda

Reusam nanggroe han teudapat
Reusam adat han biasa
Tuto gasa kalam singkat
Ampon deelat barang sabda

Teureutib meujeulih amat sangat
Nabi Muhammad sang teurtawa
Binatang gle teuduek di nap
Jingadap bak Nabi kita

Jilakee ampon dum bak Nabi
Sajan ile ngon ie mata
Rasulullah seuot nyoeban
Gata intan han le deesya

Ban jideungo sabda Nabi
Mangat ate dumji rata
'oh lheueh ampon nibak Nabi
Binatang gle dum jigisa

Teungoh jiwoe dum meuriti
Tuanteu Ali kalon rupa
Ban neukalon peulandok kance
Neubeudoh le nemeung tanpa

Adat kon pantah di po waki
Rab teukeudi hilang nyawa
Ban jikalon that meuseuke
Jipeugah le sigra-sigra

Ampon tuanku binatang gle
Bak Nabi ka ampon deesya
Ban neudeungo Saidina Ali
Mangkat ate suka cita

Beukit meunan he po waki
Raja kafe jak tangaza
Meuhan katem peungon Nabi
Kupoh mate bansineuna

Teuma seuot le po waki
Jibeuot le jaroe dua
Ampon tuanku nibak doli
Bak kami ateueh jeumala

Mata ate lidah bibi
Jaroe gaki tuboh nyawa
Hana patot lon meuungki
Buet nyan neubri lon keurija

Deungon tulong Poku Rabbi
Kafe 'asi kupoh fana
Raja Bada kupoh mate
Nyang meuungki keu Rabbana

Meuhan jipateh Allah ngon Nabi
Kupoh mate bansineuna
Meunan kalam di po waki
Esok hari phon tamula

Meuna umu Tuhan neubri
Udep mate sajan gata
Teutap sinan di po waki
Tuanteu Ali teuma neugisa

Neujak keudeh ubak Nabi
Binatang gle neupeuhaba
Abeh neupeugah awai akhe
Lheueh nyan Nabi lakee do'a

Beungoh uroe pagi hari
Geuhei sare ek cong guda
Geutamong lam tantra kafe
Binatang gle sama-sama

Nyang rot tunong tuanteu Ali
Kabed ngon Masyil blah utara
Laen nibak nyan malaikat
Timu barat Ahlon Asma

Geupeuek sigo dum meusapat
Nabi Muhammad lakee do'a
Sama teungoh kafe laknat
Malaikat dum di lua

Kilat peudeueng han jan tangieng
Ngon leumbeng na dum bak nyang ka
Tuanteu Ali rot geunireng
Neutak meucring lhong di raja

Raja Bada badan leunteng
Ban gaseng pantah jigisa
Adat kon na pantah jingieng
Putoh keuieng meukhan dua

Ban jikalon hana cakap
Jikarat ngon silagoena
Kafe paleh le that rakyat
Sang kiamat bumoe donya

Di dalam gohlom meugugat
Jikarat laen di lingka
Ban meuteumee deungo Kated
Jiintat sampoe u lua

Leupah langsung troh u barat
Meuhadap ngon Raja Bada
Ban sare troh keunan ka rab
Jiseumangat uleh raja

Peurab keunoe wahe sahbat
Na peue hajat lon ngon gata
Padum lawet cre ngon teumpat
Han teuingat le syeedara

Pakon meunan tapeulaku
Han ek taeu kamoe nyang na
Ayah gata kon tarohan
Sigeutu han ingat guna

Hana tangieng sagai laman
Pakon meunan akai gata
Adat salah leubeh sikai
Bek troh ajai tapoh fana

Patot meunan tapeulaku
Hana ingat keu guna-bina
Peue nyang hajat tameunapsu
He adoe po ulon peuna

Kabed seuot teuma meunoe
Tuhan sidroe amat kaya
Beuthat kabri meuh sikatoe
Hana keupeueku areuta

Na kadeungo raja pindoe
Kupeurunoe nyang seujahtra
Meuhan kapateh Allah ngon Rasul
Bak uroe nyoe kupoh fana

Raja Khandak di meuligoe
Kukoh takue sigo fana
Ban jideungo tuto seungkoe
Nyum ka tuloe lam teulinga

Muka beungeh ate saket
Dum geuceupet bak angeeta
Raja Bada rimueng sulet
Jitak meuglet le di muka

Bek antara putoh kulet
Meusaket han bak angeeta
Meusigeutu hana saket
Got that kulet meutheun raya

Kabedpi meunan jicang bit-bit
Jiboh euncit Raja Bada
Jitak ulee jiproh bangkang
Seun sigantang meuk teupanca

Meubube broh hana leukang
Kulet ceukang sang meulila
Meusion ok hana lapang
Geuliwang nyang na meuputa

Hana saho talo meunang
Pahlawan dua sabe sa
'oh han ek le geumupioh
Teubiet reuoh lam-lam mata

Tuanteu Ali hana teudoh
Teungoh meugeucoh neucang lanja
Suara peudeueng meugeureupoh
Di jeuoh sang geumpa raya

U likot nap peudeueng pajoh
Ulee putoh meugeugisa
Tuanteu Ali meunyum leumoh
Han ek le poh kafe that bha

Blahdeh blahnoe geumupioh
'oh nan teudoh siklep mata
Tamse intan deungan pudoe
Tamse putroe deungan raja

Soe nyang deungo mangat asoe
Meuduek adoe sang biula
Raja Khandak kafe pindoe
Jideungo bunoe mantong padra

Jitren di rumoh lam meuligi
Duek di bale sabe tuha
Jiyue pileh nyang meusoe-meusoe
Jiteubiet droe raja raya

Na lhee reutoh uleebalang
Tungang-tungang dum peurkasa
Raja Khandak teubiet u blang
Jipasang ateueh geureuda

Sayeuep linteueng ban seulayang
Sang gambang di nanggroe diwa
Gaki kuneng ban meuh mirah
Paroh cidah ban kuasa

Matajih hu bandua blah
Hana ubah bintang kala
Rupa elok bangon cidah
Siulah meureudu diwangga

Gukee tajam dum peunyuko
Bulee hijo sang mutiara
Raja Khandak duek di baho
Jibapo u dalam tantra

Jipeh geundrang jipoh tambo
Rakyat that le laksin laksa
Raja suroh mupeurasan
Peurmaenan meusuka-suka

Ban jideungo suroh sulotan
Peh bunyian hana reuda
Kram-krum rotdeh tadeungo bunyoe
Tam-tum rotnoe tadeungo subra

Peurasan le meuribee bagoe
Han tatupeue peugah rupa
Dangdi nuri meunduli
Hareubab bangsi ngon biula

Peh ceuracap yup napiri
Keucapi ngon gambang Jawa
Ngon seurune ka meuti-ti
Ngon napiri ka meu'a-a

Sangkaikala le cit meusu
Ngon beureugu subra donya
Banyak rupa le that lagu
Peurasan le tadeungo subra

Han tatu'oh peugah laku
Meu'u-u ladam meu'a-a
Saboh bangon jak ngon ulee
Saboh lagee jak ngon dada

Jimeugrop-grop meudilee-dilee
Ulah lagee gajah meunta
Sira jijak jimubareh
Jipeueh beude bak dada

Saboh bagoe jimeutangkeh
Saboh lapeh jimeuen ganja
Jimeurinthak rotdeh rotnoe
Sira dum nyoe jimuwa-wa

Jimeutop-top| ngon leumbeng beusoe
Jilambong droe pura-pura
Jisrom keudeh jisrom keunoe
Jisambot ngon jaroe teuma

Sira tinggong pru jitinjak
Meuen galak muda muda
Rotdeh rotnoe jimeulika
Jimeutak-tak pura-pura

Ladom tajo jikeumeung tak
Jitheun tumbak nyan jisangga
Rakyat le that troh mubalak
Jisurak bube geureuda

Sideh geupreh sinoe geujak
Meurumpak ngon Raja Bada
Rakyat teudong dum meusigak
Jisawak beude bak dada

Ban meuteumeung ngon si banyak
Raja Khandak ate suka
Raja Bada tamse burak
Jisawak ateuh jeumala

Jiwa aneuk jicom bak dhoe
Samlakoe beu mubahgia
Bu meutuah he aneuk droe
Jeh 'oh uroe cre ngon bapa

Kukira aneuk gata han le
Ka mate dalam prang raya
Mantong umu hana mate
Boh ate beu mubahgia

Gata aneuk tangke ate
Bu meusampe kupeulara
Meuseulamat bak ulon nyoe
Kumeukaoi bak beurahla

Ban jideungo meunan bunyoe
Jibeudoh rui Raja Bada
Ngon pahlawan mangat asoe
Jiek tanggoe dalam tantra

Di likot nyan raja pindoe
Bandua droe ngon aneukda
Di sinoepi ka geugrak droe
Sahbat Rasui Nabi kita

Deumpek surak rih bunyoe
Rotdeh rotnoe tadeungo subra
Awai phon lheueh ali-ali
Hana khali jigeulawa

Rotdeh rotnoe bandua si
Tadeungo ca-ci ban seulingka
Lheueh nyan meugrup le jipeutoe
Di jaroe peudeueng ngon cokma

Tuanteu Ali teudong keudroe
Hana sapeu neumeuhaba
Kafe paleh keureuleng keunoe
Jingieng geutanyoe ngon iku mata

Ban neukalon got meujandreng
Rot geunireng peudeueng neupuba
Zulfaka beusoe seureuloe
Miseue apui hu meunyalra

Hana jan rab troh jipeutoe
Ban meureumboe ka binasa
Kafe paleh hana jitupeue
Maken meutamah that angkara

Nyang rotdeh baro neukaweue
Nyang rot keue laen ka teuka
Jiek laju dum meurui-rui
Sang sungoe teuka ie raya

Teungoh neupoh dum neukiloe
Maken jilui lam seunjata
Su beude tadeungo kram-krum
Nyang meutum-tum sigo hana

Rakyat mate han le meudum
Reubah pam-pum ban seulingka
Ban-ban keunong hana meunyum
Miseue sidom laen teuka

Ban mate nyawong hilang
Laen datang leubah bak nyang ka
Mate teutiek dum teugaleue
Bulure-bulue raya-raye

Kafe paleh maken that kheue
Keunan jipeukeue dalam tantra
Troh lom dudoe nyang kreueh iseueng
Uleebalang saboh tantra

Meugoh mate han jiriwang
Jiceumeucang troh 'an seunja
Meuntroe Hunak nan geurasi
Panglima 'asi beuhe raya

Ate beuhe that beurani
Baranggakri han jitaba
Jiek laju jikap bibi
Tuanteu Ali jidak mita

Dalam tantra wie ngon uneun
Jisrom trang-treung jeue meulila
Jijak rabong baranggari
Sit teukeudi ka binasa

Silap bacut hana meukri
Keunong Masyil roh meusingkla
'Oh ban jithee ka meukeumat
Jikarat ngon abeh teuga

Tamse eungkot keunong pukat
Jigunto jrat leupah u lua
Bitpi meunan gadoh ingat
Yo meugap-gap leungo jungka

Puleh bak nyan lom jitajo
Maken beuhe nibak nyang ka
Silap bacut ka teulanjo
Jieumpu keunong keupala

Jitak di ulee troh u baho
Jitajo leupah u dada
Badan beukah jih teupako
Meuhambo di ateueh guda

Teutap mate jih di sinan
Kheundak Tuhan Po Nyang Esa
Tinggai nanggroe gampong laman
Kafe jahnam asoe nuraka

'oh leueh mate meuntroe Hunak
Raja Khandak lom meusabda
Jinoe taek beu mubalak
Deumpek surak lom tangaza

Meukon meunan peunyum lon nyoe
Rusak geutanyoe prang han padra
Ban jideungo meunan kacak
Teuma jisurak Raja Bada

Jiek rakyat dum mupadoe
Rotdeh rotnoe ban seulingka
Sahbat Nabi sama teungoh
Kafe peunoh dum di lua

Geunta langet geunta bumoe
Nyum lham nanggroe siklep mata
Rakyat le that miseue unoe
Han tatupeue peugah rupa

Tiba-tiba kheundak Tuhan
Neupeutren yoh nyan saboh bala
Jimeucang-cang sabe keudroe-droe
Kafe pindoe seupot mata

Nyang aduen jitak adoe
Nyang parui jipoh teumuda
Nyang dalem jipoh aduen
Nyang keumuen jipoh apa

Han jituri adoe aduen
Beuhe geusuen hana bida
Raja Khandak kafe pindoe
Jimeucang ateueh geureuda

Jicang rakyat dum kawom droe
Siblah nanggroe rab seureupha
Jidrop keudeh jidrop keunoe
Meusoe-gumoe dalam tantra

Raja Bada kafe bajeueng
Ateueh rimueng jipoh lawa
Hana jituri ureueng gampong
Abeh jikeupong bansineuna

Leupah u nap bacut jiplueng
Meuteumeung ngon Ali Murtala
Ban neukalon jroh samlakoe
Neupeurunoe nyang seujahtra

Na kadeungo raja pindoe
Nyang got kawoe bak agama
Meuhan kapateh Allah ngon Rasui
Kukoh takue kah binasa

Ban jideungo tuto seungkoe
Jikheun meunoe sigra-sigra
Beukit meunan wahe Ali
Na lom lagi peugah lanja

Na tatube thee buet teukeudi
Di akhe kadang ngon gata
Bek antara puntong lihe
Bah mate hana kurela

Bitpi meunan kupeugah kri
Teutapi na bacut haba
Beukit mate kee dalam jeurat
Nyoe amanat kee bak gata

Tiep-tiep raja dum teupat
Donya akhirat han meutuka
Beukit mate gadoh adat
Nyang pangkat mantong sit raya

Beukit na aneuk meusiurat
Keunan meuhad sret pusaka
Baranggadum meusambat-sambat
Nyang adat mantong sit raya

Meukon meunan tatem pike
Taba mate han sapeue na
Bit takalon agama kafe
Meuhan meukri pat kurela

Ban neudeungo tuto singke
Tuanteu Ali beungeh raya
Han jan jiweh meusipade
Sinan mate le meutimpa

Bek antara leupah jiplueng
Meurimueng han jan jigisa
Reubah sinan le teugageueng
Sret seulinteueng hilang nyawa

Teutap mate sinan layee
Neukoh ulee ngon zulfaka
Neucok ate neubri keu asee
Lheueh nyan neuseubee ngon zulfaka

Teuduek siat 'oh na dilee
Laen lagee lon calitra
Meulagee sot hana meukri
Bah lon cuba ci balek lagee

Banja wajebeu miseue nyang ka
Banja dua miseue dilee
Tamse haba ureueng tuha
Meugot rupa keunong lagee

Kadang makmu le areuta
Hana reuda teuka jamee
Untong-untong jeuet keu raja
Buet Allah Ta'ala soe tube thee

Bahkeu dumnann dua banja
Meule haba gadoh lagee
Teutap mate Raja Bada
Raja raya hana jithee

VI. TREN UJEUEN BATEE PADEE UBENA

Mantong sinan dalam tantra
Goh jigisa meuhad teuntée
Po tallah bri peutren bala
Ateueh raja kafe asee

Hana teudoh sabe teuka
Seubab mulia that pangulee
Tulong Tuhan Po Nyang Esa
Neubri teuka ujeuen batee

Sret di mayang raya raya
Ube raga asoe teungoh lhee
Han jan jiplueng meusideupa
Abeh ceulaka dum meuseubee

Hanco ulee beukah jungka
Troh bak dada ujeuen batee
Leubam-leubum ban seulingka
Hana reuda sret meuree-ree

Ladom keunong di keupala
Ladom muka ka beukah lhee
Ladom keunong meukhan dua
Patah ngon pha meukhan singkee

Darah ile ban ie raya
Hanyot guda dum meuree-ree
Kafe paleh sosah raya
Seubab hana pat meusilee

Han jitukri mita bicara
Palet ija nibak ulee
Ladom seuon peurise raya
Asai meuka teutop ulee

Kupiah peurise di keupala
Beukah dua jeuet keu abee
Bitpi dumnann ka jirasa
Han cit lia kafe asee

Jiek laju keunan lanja
Dalam tantra dum jikajee
Kafe paleh pungo gila
Abeh ceulaka seudee-ratee

Han tatudum ujeuen raya
Sret u donya dum meuree-ree
Tadeungo sang pande teumpa
Meunan suara keuta-keutee

Saboh bangon sang su nuga
Saboh rupa sang su palee
Keutam-keutum hana reuda
Keunong di muka aneuk batee

Rakyat mate le lagoena
Khieng donya han ek tatubee
Siuroe-uroe siploh laksa
Hana reuda sabe layee

Darah ile silangoe guda
Sang kuala taeu lagee
Bangon tamse laot raya
Jeuet taba kapai meuribee

Mate sabe hana reuda
Seureupha na ka bulueng lhee
Nyang mate dudoe takira
Nyang luka ulon peuteuntee

Nyang capiek na siploh laksa
Nyang buta na lhee ploh ribee
Han ek jitheun le jimeutha
Teuma jibungka dum meuree-ree

Ladom jiplueng dalam rimba
Lop lam guha padok ulee
'oh meuteumee kayee raya,
Jidong lingka di peureudee

Peurintah Allah Tuhan Esa
Lheueh nyan teuma reubah kayee
Ateueh kafe dum meureula
Abeh bungka dum meuree-ree

Tamse bade angen raya
Meunan rupa taeu lagee
Reubah kram-krum ban seulingka
Hana reuda su meu'ee-'ee

Ateueh kafe dum meugeundra
Seun silaksa jih meuseubee
Han jitukri pubicara
Abeh daya jipeulagee

Saboh kawan lop lam guha
Kira-kira na lhee ribee
Hana sidroe jiteumee lop
Abeh jigruelp uleh bate

Tinggai sinan dalam geugop
Sigo mawot ban lhee ribee
Laen nibak nyan batee cut-cut
Leubab-leubub ateueh ulee

Patah kaki puntong teuot
Nyang ladom sret singkee-singkee
Jijak u nap roh u likot
Kafe kutok abeh seudee

Meugaki han jan jibeuet
Meurungkot sinan ka layee
Tamse angen barat laot
Leugab-leugub aneuk batee

Nyang le mate sret lam urong
Bak meukong-kong keunong batee
Patah keuieng reuloh idong
Ladom puntong takue ulee

Ladom rakyat plueng u gampong
Jijak kalon pat meusilee
Jimuplueng-plueng ruho'p idong
Ka meukong ngon-ngon meulintee

Maseng-maseng peulheueh untong
Peulheueh nyawong bek meuseubee
Ladom ka troh yup seurrayueng
Nyang tudong mantong bak ulee

Raja Khandak kafe bajeueng
Dalam leusong jisak ulee
Jikira mangat troh u gampong
Maken tutong nibak dilee

Ladom u rumoh jimeuplueng-plueng
Sret bak rinyeun patah singkee
Nyang di rambat plueng u anjong
Bak meukong-kong beukah ulee

Rakyat mate han payah cang
Sinan seulinteung abeh layee
Nyang le mawot sret di para
Siti Mama beukah ulee

Rakyat mate dum meulaksa
Bah lon cuba bileueng ulee
Adat tahisab pura-pura
Na gunca sireutuh ribee

Lam riwayat meunan meuteumeung
Leubeh kureueng han troh eleumee
Padum lawet meunan macam
Teuma leueueng bube gutee

Nakeu baro keumeung leueueng
Kafe bajeueng mita lagee
Raja Khandak yue keurija
Tulak bala ujeuen batee

Lheueh khanduri tulak bala
Woe lam kuta dum meuree-ree
Teutap sinan dalam kuta
Ngon lasyeuka muploh ribee

Hana jiteubiet le u lua
Jimeutha lam kuta batee
Dumnan mate ka meulaksa
Maken that kha nibak dilee

Raja Khandak raya tantra
Dumnan bala hana jithee
Kutaji kong hana padan
Barangsoe tan na kuasa

Meukon tulong nibak Tuhan
Meulaenkan Ali Murtala
Meusoe laen bah pahlawan
Sep ngon rakan dum lasyeuka

Baranggasoe gadoh agam
Ngon meuriam bube-be raya
Geureuda Kafe Geumpa Alam
Jicuram babah u lua

Di babah rot Tupe Beuradu
Meujampu lila teumaga
Ngon aneuk hana jeuet taeu
'oh jimeusu geunta donya

Nyang rot baroh Dagang Rumpung
Nyang rot tunong jiboh suda
Nyang rot barat Iku Lutong
Mupayong asap keulua

Rot timu meuriam gamboh
Na lhee reutoh saboh banja
Watee meugriet teuka musoh
Siga jicoh ban seulingka

Nyang beude cut hana peue kheun
Han soe tudum boh had hinga
Lon peugah beu abeh mufom
Maklum kawom tantra raja

Teuduek siat nyan haba nyan
Muwoe karangan Nabi kita
Tuanteu Ali lon boh sajan
Nyang pahlawan that peurkasa

Teungoh geuek dum meurumpan
Geusurak ban teuga raya
Tulong Tuhan limpah kudrat
Troh keunan rab kaki kuta

Ban jikalon sahbat Nabi
Kafe 'asi that guranta
Raja Khandak ate sosah
Sinan reubah saket ulee

Bak siuroe eh teuhanta
Putroe muda jak mueng ulee
Nyankeu ibu Raja Bada
Nyang ceulaka masa dilee

Jipeuek seumbah ubak raja
Ngon suara jroh that lagee
Tuto mameh na dum saka
Ngon gula saboh teurajee

Sira jimoe ngon ie mata
Sret bak dada dum meuree-ree
Ampon tuanku di jeumala
Ho aneukda bungong keumbee

Masa dilee lon eu dua
Jinoe hoka pat meuseubee
Saleh mate Raja Bada
Dalam tantra ka meusilee

Meunan meunyum po meukuta
Pakri daya jinoe lagee
Meuka mate Raja Bada
Tinggai gata han soe malee

Ban nyang kukheun po meukuta
Hana meutuka bube gutee
Meukon meunan taeu teuma
Taboh tuba lam babah kee

Ban jideungo raja raya
Tumbok dada antok ulee
Neumeung top droe ngon seunjata
Pura-pura di ulee-ulee

Jipoh-poh droe sare subra
Putroe muda kalon lagee
Ban jikalon rab ceulaka
Teuma jiwa jipeusilee

Jimeulawan han peue peugah
Teuma reubah lam peulangkee
Raja Khandak teungeut indra
Putroe muda nyang mueng ulee

Jiploh ngon ok jipot dada
Ngon ceumara that mangat bee
Putroe teuma leubui mata
Bandua sinan teuadee

Putroepe cut mantong muda
Ube hawa jipeulagee
Umu lhee uroe teungeut indra
Teuma jaga kafe asee

'oh teukeujot kafe 'asi
Sahbat Nabi ban seulingka
Ngon angkatanji ka ase
Yue tet beude ban seulingka

Hana teudoh sabe jicoh
Jitot sunggoh beude raya
Nyang beude cut han ek peugah
Jitadah babah dum u lua

Jimeugrop-grop sira mubeude
Jikheun ka mate ureueng di lua
Di luapi han peue pike
Geuek sabe dalam kuta

Boh beude po miseue unoe
Hana sidroe na binasa
Hana saboh keunong asoe
Tuhan sidroe nyang peulara

Geuek laju rotdeh rotnoe
Banpeuet sagoe ka geulingka
Raja Khandak teutop ulee
Meunyum layee sang ie muka

Han jitukri mita lagee
Kafe asee sosah raya
Jicok kayee ka roh batée
Peue meuteumee srom u lua

Jicok tanoh roh seulungkee
Seudee-ratee pungo gila
Ngon mukjizat Nabi Muhammad
Kafe laknat ate lia

Tuanteu Ali nyang that kuat
Neukarat bak pinto kuta
Di kafepi keunan mundo
Bak pinto keunan jimeutha

Tuanteu Ali sang-sang tuloe

Ka neueumpoe pinto kuta

Pinto hanco rakyat bicah

Mate patah na silaksa

Ban neukalon ka teupeuro

Neulalo leupah lam kuta

Peudeueng zulfaka neumat di jaroe

Ka neuseudoe seun-seun silaksa

Teungoh neupoh dum neukiloe

Meuteumee ngon raja raya

Ban neukalon kafe pindoe

Neukheun meunoe sigra-sigra

Kadeungo lon peugah jinoe

Kupeurunoe nyang seujahtra

Nyang got jinoe lon peugah trang

Jinoe kaulang bak agama

Ban jideungo tuto seungkoe

Jikheun meunoe sigra-sigra

Adat kayue masa dilee

Kadangpi mee kutem rela

Jinoe han kutem kah peulaku

Bah beu sulu kee ka tuha

Rakyat ka mate kee ka malee

Patotkeu mee kah keu bela

Tuanteu Ali meunyum marah

Muka juah jiek bisa

Han jan abeh lheueh jipeugah

Neueumpah ngon cokma raya

Han jan lheueh jicok langkah

Sinan reubah le meutimpa

'oh lheueh mate raja kafe

Geutamong le dum lam kuta

Sahbat muhajir ngon ansari
Laen lagi bansineuna
Teuduek haba sahbat Nabi
Meulangi keu putroe muda

Ban jideungo tan le suami
Jibeudoh le jak peunyata
Ban jikalon bit ka mate
Jimoe sabe limpah dada

Jimueng ulee jiwa gaki
Putroe siti sangat rugha
Hana teudoh jimoe sabe
Sajan ile ngon ie mata

Suara mangat tiwah bangsi
Meujan-jan ri sang biula
Ulah bangon budiadari
Sang-sang mise anak indra

Bak mubae jroh that lagam
Meunoe macam phon jimula
Bukon sayang kukalon mancang
Teungoh meudulang reubah meutimpa

Keupeue guna tinggai sarang
Tan sigupang le hareuga
'oh kuingat bukon sayang
E buleuen trang gata bungka

Bukon sayang kukalon bintang
Tujoh sikarang di langet donya
Han jan leumah deuh kupandang
Ka leukang sang broh lam mata

Bukon sayang bungong geutoe
Ayeuen jaroe maen mata
Meuka mate bintang cot uroe
Tinggai putroe keupeue guna

'oh kuingat bukon rugoe
E samlakoe lon han taba
Bukon paleh tameh sagoe
Han got uroe jipheuet runga

Keupeue guna raya meuligoe
Meutan bajoe reubah meutimpa
Bukon sayang putik labu
Bungong meulu bungong seulanga

Meuka mate bintang timu
Tinggai leuptu keupeue guna
'oh kuingat bukon rugoe
Pakon samlakoe lon han taba

Bukon sayang kukalon pade
Jipot angen gle reubah meutimpa
Masa dilee hana tom cre
Nyoe hana le kueurupa

Bukon sayang bungong sirungke
Sret meugule dalam tika
Raja Badapi hana le
Ka jimate sajan gata

'oh kuingat bukon reule
He boh ate pakri daya
'oh kuingat weueh that ate
Ka mate sigo bandua

Bukon sayang minyeuk simplah
Di dalam klah ro u lua
Bak kukira aneuk meutuah
Mate nang mbah tinggai gata

'oh kuingat bukon teulah
Rasa reuloh langet donya
Bukon sayang bungong sirunoe
Putoh taloe sret meutia

'oh kuingat bukon rugoe
Bandua droe sigo hana
Haba meuawo bahle 'oh noe
Meule bak nyoe hana gura

Teuduek 'oh nan dilee siat
Muwoe riawayat keu Nabi kita
Tulong Tuhan Po Nyang Ahad
Ka seulamat nibak mara

Lhee reutoh droe nyang na syahid
Seubab mukjizat Nabi kita
Meunan meuteumeung lam riwayat
Tuhan halarat thee sibeuna

Nyang rot kafe han peue peugah
Miseue ulah ta'un raya
Meunan kata saheb kisah
Teutapi Allah thee sibeuna

Amma bakdu teuma akhe
'oh lheueh mate raja ceulaka
Bandum rakyat sosah ate
Peue jeuet mate po cut raja

Jimupakat bandum sare
Agama kafe takeulua
Bak lon sidroe meunan pike
Meuhan mate geupufana

Seuot bandum teuma dudoe
Nyokeu meunoe ban kheun gata
Teuduek 'oh nan kafe pindoe
Nabi geutanyoe neumeusabda

Neuyue seutot dum sinaroe
Ureueng nanggroe tuha muda
Abeh jiwoe dum sinaroe
Ureueng nanggroe tamong lam kuta

Hanyot bangke hana bagoe

Jieu ka doe bangke dumna

Teuma jijak dum sinaroe

Lagee bunoe dum seureuta

'oh sare troh ubak Nabi

Jicom kaki dum seumua

Teumakot that hana sakri

Keu Saidina Ali nyang murtala

Lheueh nyan Nabi neupeuislam

Inong agam dum seureuta

Ngon beureukat juho alam

Abeh tamong dum agama

Abeh Islam ureueng nanggroe

Geuboh gantoe raja raya

Kabeh ngon Masyil peugot nanggroe

Bandua droe mat neuraca

Saboh geuboh peurdana meuntroe

Nyang sidroe geuboh keu raja

Beukit meunan lon peugah soe

Nyankeu Masyil geuboh peurdana

Teutap sinan bandua droe

Muda samlakoe mat neuraca

Neucok rampasan lam meuligoe

Intan pudoe ngon meutia

Alat raja alat putroe

Dum sinaroe han ek kira

Laen nibak nyanpi le bagoe

Han tatupeue peugah rupa

Ngon dendayang dum sinaroe

Ngon sambinoe dara dara

Meuh ngon pirak intan pudoe

Abeh dumpeue neupeujeumba

Ladom neubri keu ureueng nanggroe
Tinggai keu droe dua bara
Laen nibak nyan dum sinaroe
Neujok u jaroe Raja Muda

Neujok bak tangan muda samlakoe
Lheueh nyan neuwoe Nabi kita
Deungon peurasan le that bagoe
Ireng sinaroe rakyat lingka

Galak ate bandum rakyat
Ka seulamata nibak mara
Sira geujak mupeurasan
Ngon bunyian sangat gubra

Padum lawet geubeurjalan
Sampoe tuan Nabi kita
Troh u Makah Nabi neuwoe
Ureueng nanggroe nyang di sana

Ka jiteubiet dum sinaroe
Jak mat jaroe Nabi kita
Lheueh meuteumee bri horeumat
Woe Muhammad u rumoh tangga

Teuma laen bandum rakyat
Geujak intat troh u tangga
Lheueh nibak nyan teuma dudoe
Nabi geutanyoe lom meusabda

Neupeugah bak ureueng nanggroe
Jak gata woe dum tagisa
Neupeugah bak ureueng nanggroe
Kafilah woe bak Prang Bada

Hoka gata bandum jinoo
Maseng jak woe nyan u tangga
Maseng-maseng woe u teumpat
Tinggai Muhammad nyan di sana

Alhamdulillah 'oh noe tamat
Buet Muhammad prang ngon Bada
Ka Tuhan bri nyan seulamat
Tulong halarat Tuhan Esa

Uroe Sabtu lon peutamam
Watee meuhad bak pukoi sa
Dumnan teungku lam naseukah
Ulon tamah bacut haba

Bukon sayang pucok lipah
Cabeueng reubah dalam pade
Ulon tuan sangat sosah
Bala Allah sabe-sabe

Tiep-tiep thon kheundak Allah
Teuka sosah he boh ate
Di gop makmu kaya limpah
Aneukjih sah udep mate

Nama ulon han lon peugah
Brok meuleumpah lom meukude
Nyankeu seubab han lon peugah
Malee babah sabe-sabe

Kareuna lon nyang hina that
Ureueng seumurat he cut kande
Nama gampong dek meutuah
Geupeugah nan Leubok Tuwi

Baroh bacut Jungka Gajah
Lheueh nyan sudah gampong kami
Paya Itek teumpat nang mbah
'oh nan sudah haba ini

— TAMAT —

2364 1984



PN BALAI PUSTAKA — JAKARTA

